



17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
4


金石續跋

中



古140
853-211
p-12





我堂金石文字續跋卷五

偃師武億虛谷著

男穆淳編

孫未

重校



唐鴛鴦碑題名

在秦山

岱嶽觀諸題記內一文云節度判官中大夫檢校尚書口

部郎中兼侍御史敬謩節度押牙中大夫試殿中監馮珣

山人呂滔文林郎守兗州府兵曹叅軍田浩文林郎任城

縣高鏗朝散大夫行任城縣令權知乾封縣令楊序節度

驅使官朝散郎試光祿寺主簿明幹唐建中元年二月廿

日同缺因訪瑤池故志之敬謩見唐書宰相世系表謩大

理司直與此題名相符又楊序亦見表觀王房而未著其

歷官蓋表文有脫

大辨正廣智三藏和尚碑

正書建中二年十一月

碑中斷裂首題銀青光祿大夫御史大夫上柱國馮口縣
開國公嚴郢撰銀青光祿大夫彭王傳上柱國會稽口開
國公徐浩書新唐書郢本傳盧杞引郢爲御史大夫其階
與勳爵皆未及浩本傳德宗初召授彭王傳神道碑云皇
上登寶位徵
拜彭王傳而階銀青亦未之及會稽下缺字於時進封郡公當
爲郡字也碑載大辨恩遇之隆自元宗特見高印訖肅宗
代宗三朝皆爲灌頂國師初以特進大鴻臚褒美及示疾
不起又就臥內加開府儀同三司肅國公滅度後代宗爲
廢朝五日贈司空按不空見舊唐書王縉傳云胡僧不空
官至卿監封國公與碑相符

吳嶽祠堂記

正書興元元年十月

記文前列將仕郎守太子正字馮翊冷朝陽書碑末題堂
書記朝散大夫殿中口御史內供奉于公異奉命爲記案
書碑在製文者之前朝陽爲朝官尊于幕寮也公異傳見
舊唐書云吳人登進士第文章精拔爲時所稱建中末爲
李晟掌書記今此碑題銜正值其時惟充殿中侍御史內
供奉官是以幕吏兼憲職史不具錄矣記稱鳳翔隴右涇
原四鎮北庭兼管內副元帥兼中書令西平郡王李公晟
有事于吳嶽之祠下又云詔使中使孟希价持傘賜神錦
袍金帶夫人花冠後又徵諸故事當開元廿八年詔使正
議大夫內口侍竇元禮賜食致祭至天寶八年哥舒翰拔

石堡破番蠻封神爲成德公至德乾元之間累有褒口口
爲天嶽王禮儀志天寶十載正月遣大理少卿李禎祭吳
嶽山成德公後肅宗至德二年春在鳳翔改汧陽郡吳山
爲西嶽增秩以祈靈助據碑則由八載哥舒翰平蠻始進
封成德公而至德間增秩不書爵號今碑所云封爲天嶽
王足以補錄也竇元禮見逸人竇居士神道碑居士之季
子元禮官梨園教坊使行內侍省內侍又載元禮爲正議
大夫並與此記合天寶八年當稱載追紀者失實

救苦觀世音菩薩石像銘

正書貞元七年二
用在洛陽龍門

石像銘戶部侍郎盧徵撰前三行損蝕蓋自序初以劉晏
得罪坐貶珍州司戶故云夜宿龍門香山寺口龕天眼口

口相對口首口嘿如暫降臨因發誠願歸施之日於此
等身像一軀此乃夜郎之役也夜郎卽珍州與史志合序
又云貞元更黜又過於此僕夫在後獨行在側有白衣路
人隨口先後因唱言曰去日花開來時菓熟其去也春三
月貶信州長史其歸也秋八月遷右司郎中詳求所言昭
報復以闔門幼弱萬里沿岸畏途炎裔鮮克保全勝衣含
氣我獨無口卽知慈雄覆護匪無顯効云舊唐書列傳
盧徵范陽人元琇薦徵爲京兆司錄度支員外琇得罪坐
貶爲信州長史遷州刺史入爲右司郎中驟遷給事中戶
部侍郎並與徵自序合新唐書徵附劉晏傳後所載琇得
罪貶秀州長史誤也徵後書長兄從時任河南府司祿參

軍及姪前鄧州南陽縣師明前汝州葉縣尉師牧師稷師
益諸人名

法玩禪師塔銘

正書貞元七年十月在登封少林寺

名載法玩俗姓張氏其先魏人年十八學道于大照大師
廿受具戒報年七十六僧夏五十七以貞元六年秋八月
十三日寂滅于東都敬愛寺越十九日門弟子等奉全身
建塔于少林寺之西偏纒杖執紼赴喪會者以萬數按大
照卽普寂賜號他文誌釋氏之歿多云俗壽若干僧臘若
干此作報年作僧夏送葬之衆史于大照稱士庶傾城哭
送間里爲之空及大智薨伊闕之北送葬者數萬人狂逐
風靡斯最濫矣銘前列太中大夫守京兆尹上護軍賜紫

金魚袋李充撰舊唐書德宗紀貞元八年壬午以左庶子
李允爲京兆尹是允卽充之訛文而紀前文有二月丁亥
則此壬午爲三月紀脫紀矣後文十一年夏四月壬戌貶
京兆尹李元信州長史元又允轉訛皆依碑作充爲正充
撰銘當貞元七年十月已列銜京兆尹紀書在八年爲京
兆尹舉其實官言之也最末乃列扶風馬士瞻書無官階
不敢與撰者並銘又云紀無相之士宜略其族譜述無爲
之教宜捨其示現蓋文後見例凡爲僧誌者所當取式于
此

裴潏嶽廟題名

右題名正書在盧朝徹謁嶽文之後文云貞元九年七月

廿五日參軍事裴潏題後列進士裴諫裴諱懷州河內縣
丞盧渚前華陰縣丞盧佩前萬年縣裴堪等名舊唐書列
傳裴潏河東人少篤學善隸書以門蔭入仕元和初累遷
右拾遺轉左補闕新唐書同據題名貞元九年方為參軍事此
卽以門蔭入仕時也沈亞之河中府參軍廳記國朝設官
無高卑皆以職授任不職而居任者獨參軍焉觀其意蓋
欲以清人賢胄之子弟將命試任使以雅地任之耳文苑英華
關中金石記攷潏以蔭起家此稱參軍事而不著地當卽
是華州諸司但未辨何司予以職官志上州司功司倉司
戶司兵司法司士六曹參軍事各一人外又有參軍事四
人華州為上輔於設官當四人然則潏稱參軍事卽四人

中之一非六曹諸司也題名字體端勁必潏之自書得此
益見善隸書非虛美矣

鄭全濟華嶽題名

右題名正書自左起文云將口口守尉鄭全濟字巨舟華
陰縣尉李端士華陰縣尉鄭暉貞元十三年三月廿四日
題記鄭暉見宰相世系表

河東鹽池靈慶公神祠頌碑

正書貞元十三年四月

碑記為將仕郎太常博士崔放撰將仕郎前試大理評事
韋縱書新唐書宰相世系表崔氏清河小房有放與敦敷
波敏列一格韋氏鼓城公房有縱左金吾衛兵曹參軍今
碑所署卽其人記載元宗御國五十年姦產薊邱嗣聖受

命以兵靜之調發之費仰于有司雖田征益加而軍實不足遂收鹽鐵之算置推酤之官西籠解梁左繚安邑終歲所入二百千萬供塞垣盡敵之賞舊唐書食貨志云自天寶末兵興以來河北鹽法羈縻而已暨元和中皇甫鎛奏置稅鹽院同江淮兩池權利人苦犯禁据此碑言代宗時因兵興已置推酤則鹽法非止爲羈縻已記後載貞元九年天子親祀明堂云戶部尙書裴公延齡以河中爲會府遂表職方郎中兼御史馮公興推其事又命前永樂縣丞張巨源前鄭縣丞蕭曾率屬而臨之洎十一年秋九月裴公薨今戶部侍郎蘇公弁繼之又以前詹事府司直陸位知解縣池前大理評事韋縱知安邑池唐時兩池置官

略備于此矣延齡首籠利權以毒天下而其爲之佐者又數人本傳惟言貞元八年遷戶部侍郎制度支比設謀鈞距肆爲剝蝕皆已悉書而酤鹽在河中獨不及之又八年

爲戶部侍郎至九年已歷尙書史於其轉官更失紀皆疎

也新唐書本傳同碑稱貞元十一年秋九月裴公逝今戶部侍郎

蘇公弁繼之延齡傳作十二年蓋史誤弁本傳裴延齡卒

德宗聞其才特開延英面賜金紫授度支郎中副知度支事遷戶部侍郎依前判度支與碑所記符記前云中宗復

政崇朝而復鹹大歷陰霖巨漲而不淡蔣鎮傳鹽池爲潦水所入其味多苦韓滉慮鹽戶減稅詐奏雨不壞池池生瑞鹽當時固以欺飾爲之而踵事者又勒之頌詞以長其

授堂五石文字續跋卷五
六
偽然則敖之文雖贍腴固非實錄也

徐浩神道碑

貞元十五年十一月

碑後題銜稱表姪前河南府叅軍張平叔題諱新唐書食
貨志戶部侍郎張平叔議權鹽法弊請官糶鹽可以富國
李渤傳載度支使張平叔斂天下逋租昌黎集論鹽法事
宜狀議張平叔所奏蓋其歷官叅之此碑皆可畧見然終
爲一計臣而已題諱之古前跋已言之近校潛研堂金石
跋尾謂周益公跋初寮王左丞贈曾祖詩末題通直郎田
橡填諱據爲宋人已有之不知唐固有之而錢君未見此
碑全本也又麻衣子神字銘有云南陽貢士李珩填諱碑
由字述魯狎誤二男字述魯遠書文時父已沒矣因於親

諱倩人填之君子之於名終其慎如此浩碑爲次子峴所
書固猶是也

軒轅黃帝鑄鼎原碑陰

正書貞元十七年在閩鄉

鑄鼎原碑陰分三層第一層載碑銘釋文口州刺史太原
王顏撰華州刺史陳郡袁滋書舊唐書良吏傳袁滋字德
深陳郡汝南人與碑題稱郡望合其出爲華州刺史傳書
在貞元十九年後今此碑當十七年已爲華州刺史矣案
德宗紀貞元十六年三月壬子以尙書右丞袁滋爲華州
刺史潼關防禦鎮國軍使紀與傳不合以此碑証之當依
紀十六年爲是此碑十七年題銜華州刺史爲得其實傳
作十九年誤也

第二層爲王顏進玉石冊表草其略云臣所部湖城縣界有鑄鼎原欲於原最高處刻石表之選地對穿得玉石一片爲土工所折今作四段有縣珮孔子二微臣恐是黃帝上昇微臣遺墜之物臣檢算歷帝紀黃帝去今六千四百三十年伏以天下有道地不藏珍微臣不勝驚喜慶忭之至謹差朝請郎行司兵參軍暢賞隨表奉進案舊唐書經籍志有年歷帝紀二十六卷姚恭撰此表稱歷帝紀疑卽其書五行志載寶歷二年五月神策軍修苑內古漢宮得白玉牀以獻此記王顏所進玉旣請付史館志竟不見錄當以其附會非實故也

第三層題名錄事參軍裴口司功參軍張口湖城縣令房

朝靜宏農縣令李日豐湖城縣丞王遇湖城縣尉王吳圻湖城縣尉史謹鎮遏將守左武衛中郎將常憲專知官同十將試殿中監杜晏同勾當官右廂副將守左金吾衛左執戟閭晏河東裴宣簡書王雅刻字以舊唐書職官志攷之縣有鎮遏將不見于史鎮遏多屬使職而此云將疑官職後有增設也同十將之號史志亦無文右廂副將不載其屬何衛案左右武衛威衛及領軍衛各分左右廂隊而官設隊正副隊正則威衛領軍衛有之然則右廂副將其卽副隊正與金吾衛內執戟未分指爲左右得此乃知執戟五人以左右各分之共爲十人也

易州刺史田琬德政碑有十將兵馬使之號

楚金禪師碑

正書貞元二十一年七月

碑載禪師廣平程氏法諱楚金歿以乾元二年七月七日
子時具書其諸多靈跡並及恩遇之隆勅驃騎大將軍朱
光暉監護舊唐書呂諲傳肅宗卽位於靈武諲馳行在內
官朱光輝李遵騾薦有才代宗紀收捕越王係及內官朱
光輝馬英俊等禁錮之碑所稱朱光暉者是其人但暉宜
從日依碑文爲正碑爲紫閣山草堂寺沙門飛錫撰正議
大夫行中書舍人翰林學士上柱國東海男賜紫金魚袋
吳通微書通微本傳自壽安縣令入爲金部員外郎召充
翰林學士尋改職方郎中知制誥改禮部郎中尋改中書
舍人据碑文題銜爲翰林學士時已行中書舍人不應改

禮部後始轉此官也又階勳與爵傳亦失載並宜以碑補
之

勅追諡號記

追諡楚金禪師別爲記文附刻碑末文云貞元十三年四
月十三日左街功德使開府邠國公竇文場奏千福寺先
師楚金是臣和尚於天寶初爲國建多寶塔置法華經云
云奉勅賜諡曰大圓禪師文場見舊唐書載文場與霍仙
鳴並掌禁軍竇霍之權振於天下而文場自爲左神策軍
護軍中尉又累加驃騎大將軍按之碑所記歷官爵勳皆
未及也新書本傳同

渤海郡王高秀巖墓碑

馮令問撰元和二年十一月

碑載高秀巖開元中授華州萬福府別將又授壯武將軍
 同州襄城府折衝都尉旋改左虎賁將軍時丁家難歸於
 絳郡河東節度使王忠嗣請起復充河東節度都虞候廿
 八年為臨洮軍大使加輔國大將軍隴州刺史又充河西
 隴右兩道副持節河源軍城使領所統將士隴右節度使
 幽州節度慕其嘉聲表奏薊州刺史續除河東節度留後
 乾元二年遷戶部尚書兼御史大夫河東節度使渤海郡
 王上柱國實封七百戶以舊唐書按之肅宗本紀至德二
 載十二月己丑賊將偽范陽節度使史思明以其兵眾八
 萬之籍與偽河東節度使高秀巖並表送降杜工部集塞
蘆子詩思明
割懷衛秀巖西未已蓋
以哥舒翰舊將降賊者史思明傳令衙官寶子昂奉表以

所管兵眾八萬人及以偽河東節東使高秀巖來降肅宗
 大悅封歸義王范陽長史御史大夫河北節度使朝義已
 下並為列卿秀巖雲中太守以其男如岳等七人為大官
 使新唐書同是其事也然史言秀巖但為雲中太守攷秀巖為
 幽州節度表奏是當祿山時已除河東節度留後及納順
 而酬以太守恐未足滿其望如碑言節鎮郡王乃相當爾
 未審史何以遺之不書也秀巖有子八子孟曰頌次震次
 霽次霞次霖次雪次霧次霽史作男如岳等七人而如岳
 名與碑亦不符或上碑時又更易也

楊岐山廣禪師碑銘正書在
萍鄉縣

碑為中山劉禹錫撰及正書序略云禪師諱乘廣其生容

州姓張氏十三慕道至衡陽依天柱想公至洛陽依荷澤
會公後又識上首甄叔率其徒道進道宏如亮如海等具
役建塔于禪室之右廣公始生之辰歲在丁巳當元宗之
中元生三十而受具更臘五十二而終終之夕歲值戊寅
當德宗之後元三月既望之又十日後九年其門人還順
始請建銘而中山記之是爲元和二年矣碑記年書中元
後元他碑亦希見鳳臺晉燕亭官萍鄉拓得之贈予前著
錄者未及也

壁畫功德記 篆書元和四年二月

碑首題奉爲先考贈工部尙書先妣贈魏國太夫人壁畫
功德記蓋袁滋自記自書如此滋記云滋以天寶中生于

邛州安口縣五歲離蜀川路出斜谷至貞元十年奉朝命
充持節冊南詔使及過金牛縣竝嘉陵江而行泊永貞元
年滋又充貳川安撫大使因登梓州慧義寺伏思往年雲
南回日過新建竊欲資于繪事少申恩于罔極遽罹多故
有志未遑其年冬貶吉州刺史明年九月西川旣平滋亦
蒙皇慈昭洗再授旌鉞至止之日周步殿宇遂命工人圖
畫藥師琉璃光如來功德一鋪舊唐書德宗紀貞元十年
六月癸丑以祠部郎中袁滋兼御史中丞爲冊南詔使與
記合滋本傳書奉使在十九年九字傳刻誤衍耳傳言劉
闢擁兵擅命滋持節安撫行及中路檢校吏部尙書平章
劍南西川節度使新唐書本傳詔滋爲劍南西川山南西道

安撫大使半道以檢校吏部尚書平章事爲劍南東西川節度使以記証之滋自初命有充貳川安撫大使之文是也及後爲節度舊書惟稱滋爲劍南西川者得其實新書作東西川爲誤地理志廣德元年黃門侍郎嚴武爲成都尹復併東西川爲一節度自崔寧鎮蜀後分爲西川自後不改滋又安得東西川而兼領之況記言西川旣平再授旌鉞至止之日周步殿字滋生于邛州安仁縣邛州爲西川節度所治滋故以到官後得至其地此尤情事可想者也記言永貞元年冬貶吉州刺史明年再授旌鉞蓋復授西川節度非卽爲義成也新書本傳書貶吉州在于西川節度之後陵越失其次矣又旣貶刺史安得稱遠徙節度

明滋前有西川之命後方云徙義成耳史文過事節縮反于事跡有晦也宰相世系表滋父咸寧令記稱先考贈工部尚書表畧之不書以非實歷官也後又正書題銜銀青光祿大夫檢校刑部尚書使持節滑州諸軍事兼滑州刺史御史大夫充義成軍節度鄭滑等州觀察處置管內營田等使上柱國淮陽郡開國公食邑二千戶新舊二書于其階官勳爵未備載拓本裝裱成冊何夢華藏置聞近已失其石刻故著之尤加詳焉滋工篆籀書雅有古法予所見惟鑄鼎原及此而已

薛存口題名

右題名正書自左起文云司勳員外郎薛存口華陰縣令

柳澗華陰縣主簿裴秩華陰縣尉杜文舉前鄭縣丞韋殷
前華陰縣口王沂口客李口元和四年九月十九日按薛
存下缺字當作誠舊唐書薛存誠傳裴迥作相用爲起居
郎轉司勳員外與題名合柳澗附見韓愈傳云華州刺史
閻濟美以公事停華陰令柳澗縣務俾攝椽曹居數月濟
美罷郡出居公館澗遂諷百姓遮道索前年軍頓役直後
刺史趙昌按得澗罪以聞貶房州司馬愈因使過華知其
事以爲刺史相黨上疏理澗留中不下詔監察御史按驗
得澗贓狀再貶澗封溪尉又皇甫湜韓文公神道碑云華
州刺史奏華陰令柳澗贓詔貶澗官澗任華陰坐貶始末
如是然則澗之挾怨煽衆固黠吏所爲而刺史相黨必致

之罪亦世清哉

河南府司錄盧公夫人崔氏誌銘

正書元和
甲午十月

誌前列殿中侍御史內供奉竇從直撰後列公變書名而
不氏未知其于崔盧何屬也從直見宰相世系表書官兼
殿中侍御史與誌合崔氏曾夫父通許州司馬王父知遜
祕書丞贈國子祭酒父倫代宗朝以前御史中丞使吐蕃
拜尙書左丞歿諡敬公案倫附新唐書子衍傳竇應二年
以右庶子使吐蕃虜背約留二歲執倫至涇州逼爲書約
城中降倫不從更囚邏娑城閱六歲終不屈乃許還遷尙
書左丞以疾改太子賓客卒倫加官爲常袞草制見文苑
英華云頃以昆夷之俗繼好勤誠不忘緩懷喻我文告

太中大夫前太子右庶子兼御史中丞上護軍賜紫金魚

袋崔倫宣明威惠撫柔西海終能復命亦既序成云可

銀青光祿大夫行尚書左丞與誌所言拜尚書左丞合誌

言伯曰譚左司郎中仲曰榮右補闕叔曰殷衡州刺史元

昆衍德宗朝以御史大夫觀察宣歙池三州歿諡懿公衍

本傳云遷宣歙池觀察使與誌合而以御史大夫出任于外

史失載行見舊唐書孝友傳略其又誌稱叔曰殷即傳稱

倫弟殷趨白衍所稟舉送夫人所者也誌夫人書其伯叔

及兄金石例冗濫牽附無過斯者非可為式也

內侍李輔光墓誌銘正書元和十年四月

誌首列朝議郎行尚書刑部員外郎崔元略誤宣德郎前

晉州司法叅軍巨雅書文云輔光建中歲以良胄入侍

白身內養超授奚官局令勲以元從之號又遷掖庭局令

興元初遷內侍伯又承命為印納使邕管地偏人狡輔光

奏請于海口置五鎮守促又太原口帥李自良薨于鎮監

軍使王定遠為亂兵所害輔光馳命安撫便充監軍使後

特恩遙授內給事元和初復遷內侍省供奉官又拜內侍

省內侍知省事又充鴻臚禮賓使又轉內弓箭庫使又除

河中監軍兼絳州銅冶使又有聖恩表異圖形省閣之文

舊唐書宦者傳元和長慶以來高品白身之數四千六百

一十八人誌稱輔光充白身內養白身自為宦豎清資逮

元和後號始猥濫而內養之名不見于志惟楊收傳有內

養郭全穆此其可証一也食貨志大歷四年第五琦上言請于絳州汾陽銅原兩監增置五鑪鑄錢許之職官志諸鑄錢監絳州三十鑪誌稱輔光兼絳州銅冶使當以鑄錢重其事特設此官蓋權宜爲之不見于史爾史于職官內皆書勲號功臣有圖形戢武閣凌煙閣而內史省諸官獨缺錄今誌稱勲以元從圖形省閣宦者殊寵于斯極矣又王定遠見李說傳王定遠欲謀殺說後知事敗走登乾陽樓召其部下將卒多不之應比夜定遠墜城下槎枿傷而不死有詔削奪長流崖州據誌則爲見害于亂兵誌宜得其實輔光有妻輔氏子四人希晏希暹官內侍省希昇無官惟仲昇官開府儀同三司檢校太子詹事兼殿中侍御充河東節度保寧軍使行次既不從希官又不爲內侍蓋必希輔光之勢冒爲闍兒以規進取者崔元略傳元和十二年遷刑部郎中据此誌在十年署銜員外郎殆以是叙遷也元略以士人爲闍宦諛墓訟言與兄從事中都俱飽內侍之德將命錄實且無媿詞攷元略嘗以諸父事內常侍崔潭峻則其諂附出于結習固不知其言之醜也

南海神廣利王廟碑

正書元和十五年七月

碑前列使持節袁州諸軍事守袁州刺史韓愈撰使持節循州諸軍事守循州刺史陳諫書并篆額舊唐書孔戣傳戣授廣州刺史先是準詔禱南海神多令從事代祠戣每受詔自犯風波而往韓愈在潮州作詩以美之今此碑後

繫以詩者當謂此也然傳謂在潮州不知其已移守袁州
矣唐書禮樂志五岳四鎮歲一祭各以五郊迎氣日祭之
至四瀆則略而不著祭日今碑稱以立夏氣至命廣州刺
史行事祠下知與嶽鎮同也又稱册有皇帝名乃上所自
署其文曰嗣天子某謹遣官某致祭志文亦不詳其事此
文集本與石本異者惟海嶽之祝碑以祝作祀祀之之歲
碑以祀作祝又碑題集本作南海神廟碑石本闕入廣利
王三字

王璠華嶽題名

右題名正書自左起文云起居舍人賜緋魚袋王璠元和
拾伍年拾壹月貳拾陸日使鎮州宣慰舊唐書璠本傳元

和中入朝為監察御史再遷起居舍人副鄭覃宣慰于鎮

州新唐書璠以起居舍人副鄭覃宣慰鎮州此題稱元和十五年與傳合而璠

出使重鎮宜賜章服以寵其行傳失紀此事蓋從略也

裴穎華嶽廟題名

右題名正書自左起文云長慶元口口口十三日朝散大
夫行華陰縣令上柱國裴穎奉匄當再修中門屋至廿五
日功畢案宰相世系表東眷房裴穎衛尉卿駙馬都尉諸
公主列傳齊國公主下嫁張瓘又嫁裴穎年代差遠當別
為一人南來吳房亦有穎官左清道率府兵曹參軍或即
是題名者與

邠國公功德銘

正書長慶二年十二月

碑稱梁守謙于大興唐寺花嚴院翻寫經律戒論及立經堂爲國祈福因述其撫蔡之功比晉公有過焉蓋闖人楊承和爲之文故多溢詞也承和題銜右神策軍護軍中尉副使兼右街功德副使雲麾將軍右監門衛將軍員外置同正員上柱國宏農郡開國侯食邑一千五百戶錢少詹事引唐書宦官傳劉克明弒敬宗樞密使王守澄楊承和中尉梁守謙魏從簡與宰相裴度共迎江王發左右神策及六軍飛龍兵討之承和事見于史者惟此案舊唐書李宗閔傳宗閔因駙馬都尉沈蟻結託女學士宋若憲及知樞密楊承和二人數稱之于上前後鄭注發沈蟻宋若憲事內官楊承和韋元素沈蟻及

若憲

坐貶者十餘人唐書

王守澄傳帝疾元和逆罪久不討故以宋申錫爲宰相因事除之不克更因其黨鄭注李訓乘其罅於是流楊承和於驩州韋元素象州遣中人劉忠諒追殺元素于武昌承和次公安賜死是承和結黨坐貶見于史又其一也守謙碑載歷官元和初授銀璋佐密命五年加金紫掌樞機十二年後又題右街功德使驃騎大將軍行右武衛上將軍知內省事上柱國邠國公食邑三千戶充右神策軍護軍中尉明都太僕以守謙在唐史宦者無傳惟憲宗元和十五年書帝崩于太極殿中尉梁守謙王守澄等共立太子殺吐突承璀及澧王憚又引韓文公平淮西碑載守謙撫蔡一事案舊唐書穆宗紀左右軍中尉馬進潭梁守謙

魏宏簡等請立門戟從之文宗紀寶歷二年敬宗遇害賊蘇佐明等矯制立絳王勾當軍國事樞密使王守澄中尉梁守謙率禁軍討賊誅絳王迎上于江邱又增傳憲宗曰

此惟李絳梁守謙知之時絳承旨翰林守謙掌密命更與碑所載元和初佐密命合都氏皆失引長安志丹鳳門街東來庭坊上街上

將軍致仕梁守謙宅

執笏豆西嶽題名

右題名正書自左起文云執笏豆為國討叛思契丹繼祭敬拜牢餼畢陳所期感通照鑒不昧列旌旗於綠野羅口於明廷共展禮容因以題記太和二年八月十八日男守左驍衛倉曹叅軍上柱國賜緋魚袋方叅侍從朝觀接

此題執下字殘其半以名氏度之似蕃將臣於唐者然無

所徵實以攷其迹惟叛思契丹在新唐書列傳言太和開

成間朝獻凡四然天子惡其外附回鶻不復官爵渠長唐舊

書傳亦云元和長慶寶歷太和開成時遣使來朝貢則當太和二年必有叛附故遣

將聲討加以醜名曰叛思亦猶武后更號孫萬榮為萬斬

李盡忠曰盡滅默啜為斬啜也是討叛思契丹一事可以

補新舊書之闕蓋非細也

韋公式華嶽題名

右題名正書自左起文云京兆府功曹前秘書郎韋公式外甥鄭縣尉攝華陰縣主簿裴虔下低一格另書公式頻年佐理斯邑自後向逾紀六變官曹今者慮以官成身有

所繫奔馬到此追尋舊遊見前題處豈勝口口太和四年
上元日題案以後向逾紀推之此題在太和四年前題當
元和十二三年間矣官成以周禮鄭氏註謂官府之成事
品式公式率爾留記蹇蹇不忘于此信菲俗吏也

李虞仲華嶽題名

右題名自左向右正書文云正議大夫使持節缺諸軍事

守華州御史中丞充潼關缺國軍等使上柱國缺開國男

食邑三缺金魚袋李虞仲太和四年七月十缺詔以立秋

修祀缺南都團練判官缺事柳乘同來舊唐書列傳李虞

仲太和四年出為華州刺史兼御史大夫依題名乃為中

丞而非大夫至於勲上柱國爵開國男皆未之及立秋修

祀華嶽以刺史攝祭亦禮儀志文所不具南都按之

書地理志上元元年號南都為府二年罷都是年又號南

都尋罷都則江陵久不名都矣題名猶稱此者襲舊名也

呂諲傳上言請於江陵置南都勅改荊州為江陵府永平

軍團練三千人以遏吳蜀之衝南都置團練判官蓋由於

此也據舊唐書傳文

三藏大遍覽法師塔銘行書開成四年五月

銘首題朝議郎檢校尚書屯田郎中使持節洺州諸軍事

守洛州刺史兼侍御史上柱國賜緋魚袋劉軻撰後題安

國寺內供奉講論沙門建初書軻初以僧而後返正附王

璠傳與璠子遐休善者也其序元奘事特詳予叅之舊唐

書列傳元奘洛州偃師人塔銘作河南緱氏人傳稱大業末出家銘載年十三出家屬隨季失御乃從高祖于晉陽傳稱顯慶二年卒年五十二銘作麟德元年二月五日卒年六十九案銘所紀元奘之卒其生實當開皇八年丙辰年十三出家當大業四年戊辰從高祖于晉陽是爲十三年丁丑于時元奘年廿二傳以從高祖爲出家之歲又以卒年爲五十二其生固當大業元年矣二說參差如是宜依石刻爲正元奘既生于開皇八年攷隨書地里志偃師舊廢開皇十六年置是元奘之生時未有偃師故云緱氏人也傳又稱貞觀初隨商人往遊西域攷銘載師自決西行經李大亮不容出關師乃宵遁迨其歸自西域乃因高

昌商胡入朝附奏而傳附會以其初隨商人不亦謬歟岳委談以聖教序雖有三藏演文等語匪元奘號其以稱奘蓋以唐僧不空號無畏三藏譌今案塔銘旣題三藏大遍覺法師敘又稱慈恩三藏之事蓋元奘取號三藏久矣非因不空致譌也

李景讓等西嶽題名

右題名正書文云

缺

史兼御史中丞李景讓御史裏行盧


口李前右口軍錄事參軍李映進士李灌李景祐盧黨鄭

繁鄭毅開成四年六月十九日新唐書列傳景讓寶歷初

遷右拾遺以題名所題兼御史中丞此當由寶歷至開成

十餘年官序如此而史失載也景讓性獎士類拔孤仄今

附名如進士李灌凡五人從之遊覽亦其宏雅所致足為世勸也



授堂金石文字續跋卷五終

受業聊城馬翰俊

授堂金石文字續跋卷六

偃師武億虛谷著

男穆淳編

孫未重校刊

唐陳商嶽廟題名

右題名正書自左起少有殘剝文云缺門郎中史館修撰

陳商會昌元年七月二十五日祇召赴闕與盧溪處士鄧

君蟠同題缺商題後六年自禮部侍郎出鎮陝又與鄧支

使同來十月缺舊唐書宣宗紀會昌六年迎神主下百寮

議皆言准故事無兩都俱置之禮惟禮部侍郎陳商議云

周之文武有鎬洛二廟今兩都異廟可也然不宜置主於

廟主宜依禮瘞於廟之北墉下今此題稱禮部侍郎出鎮

陝者即其人昌黎集答陳商書時猶未第後元和九年進

士第此於題名時致通顯矣鄧支使不書名當爲鄧君蟠也百官志監察御史十五人凡十道巡按以制官二人爲佐務繁則有支使

崔郇嶽廟題名

右題名自左起正書文云正議大夫守京兆尹賜紫金魚袋崔郇華州華陰縣令崔宏會昌二年六月十六日郇自汝海將赴闕廷時與宏同謁廟而過按郇見宰相世系表亦見權載之集崔陞神道碑曰郇今爲廷尉實當會昌元年是此題云守京兆尹蓋由廷尉擢是職也汝海卽汝州游宦紀聞稱坡公元豐七年自黃量移汝海蓋唐時已有此名矣

崔慎由華嶽題名

右題名正書自左起文云殿中侍御史集賢殿直學士崔慎由右補闕李當鄉貢進士崔安潛會昌五年二月八日同赴案慎由見新舊書傳當會昌五年並失錄其爲殿中侍御史集賢殿直學士安潛舊書本傳稱大中三年登進士第此在會昌五年固宜以鄉貢自題也

李貽孫題名

右題名大書自左起文云左諫議大夫充宏文館學士判館事賜紫金魚袋李貽孫大中三年十二月八日奉制祈雪小男進士同吉學究靜復從行貽孫史不爲立傳予攷歐陽行周文集序爲貽孫所撰序云太和中爲福建團練

副使大中六年又爲觀察使其前結銜特詳所記實爲福建等州都團練觀察處置等使正議大夫使持節都督福州諸軍事福州刺史兼御史中丞上柱國賜紫金魚袋以此題証之當大中三年嘗官于朝至六年任於外矣全唐詩話元賓終于四門助教李貽孫序其文元賓李觀也與行周同年進士早沒而貽孫于其遺集爲之表章如此廣川書跋鄴都宮陰真人祠刻詩三章唐貞元中刺史李貽孫書蓋大中之前又爲刺史於忠州矣貞元中至大中越致通顯至此已八十餘疑貞元字尙有誤爲附識于此貽孫好文喜竒於斯可想其爲人而題名當亦貽孫所自書故可寶也

于德晦華嶽題名

題名正書自左起文云監察御史于德晦州鎮國軍判官試大理評大中六年二月二十日同謁新唐書宰相世系表德晦官同州刺史其見於史者惟此而已長安志務本坊有左散騎常侍于德晦宅

杜順和尚行記

行書大中六年
年在西安府

碑列鄉貢進士杜殷撰朝義郎試右武衛長史上柱國董景仁書其記杜順云京兆人堯之苗裔生于國之南門外村後又序師代兄從軍及爲兄補甲受笞負薪爨火諸苦行蓋忘身以濟于衆者又稱擲于急流中而復見見字旁注胡匄反惟孔紆墓誌銘出將字旁注去聲他金石刻所希聞

盧鄩幼女墓誌

正書在滎澤大
中七年七月

誌前敘云范陽盧鄩幼女姚婆年八歲後乃嘆其敏而不
壽以大中六年十月三日夭于襄州官舍以明年七月十
三日塋于鄭州滎澤縣廣武原耐叔祖贈給事中府君之
口後又題前檢校禮部員外郎盧鄩記案此誌鄩蓋官于
襄州遭其女夭歿爲返魄故原與昌黎女孥墳銘相符合
人遊宦輕棄骨肉卒云效羸博之義而薄俗相仍遺棄殤
兒爲狗彘吞噬亦已忍哉姚婆予鄉呼繼妻之不曉理者
多有是稱鄩固取以名女由于鍾愛之深故以賤字也

定慧禪師傳法碑

碑前列金紫光祿大夫守中書侍郎兼戶部尚書同中書

門下平章事充集賢殿大學士裴休撰並書金紫光祿大
夫守工部尚書上柱國河東郡開國公食邑二千戶柳公
權篆額舊唐書裴休本傳累轉中書侍郎兼禮部尚書而
不載充集賢殿大學士按之此碑兼禮部當爲兼戶部至
於傳載十年罷相是年冬進階金紫光祿大夫攷碑之建
立當大中九年已書此階然則史文繫於十年冬者誤也
休嗜浮屠講求其說演法附著數萬言習歌頌以爲樂唐新
書本傳文今碑稱定慧所著經旨書偈議論皆謂本一心而貫
諸法顯真體而融事理其推演禪趣亦云至矣定慧號宗
密姓何氏果州南充縣人其傳法自秀爲北宗以逮荷澤
傳磁州如如傳荆南張張傳宗密是其派也号不從虎避

諱故也史稱休書楷道媚有體法觀此碑信然

率堵坡塔銘 正書咸通三年八月

塔銘為高壩述並書其序毛國汭國崇昆季遵阿翁遺意建茲勝因其地北視橫山南隣畢陌所紀實者如此餘冗贅不足備錄然率堵坡即唐言塔耳而題重沓書之蓋以彼教法所名慮世不易曉故兼唐言以示其意與

左拾遺孔紆墓誌 正書咸通十五年三月在柴澤

誌為鎮海軍節度掌書記將仕郎殿中侍御史內供奉賜緋魚袋鄭仁表撰并書仁表附舊唐書鄭肅傳云仁表擢第後從杜審權趙儻為華州河中掌書記入為起居郎以此誌推之尚帶殿中侍御史內供奉及誌後敘孔紆囑友

人鄭休範為誌休範即仁表字也史並缺書誌載紆歷官

自及第後徵為渭南尉直宏文館旋以萬年尉復帖文職又奏署觀察判官假監察御史俄轉節度判官又拜左拾遺內供奉曾祖岑父皇任祕書省著作佐郎贈司空祖殲皇任禮部尚書致仕贈司徒父溫裕皇任檢校右僕射兼太常卿充翰林侍講學士册贈司空按孔緯傳載岑父殲溫裕不及贈司空司徒若以緯進加司空進位司徒當由此追贈祖父如其官也溫裕誌前載節制天平軍徵拜司戎貳卿傳亦失記仁表自敘與孔君同歲為東府鄉薦策第不中等罷去明年宴于口堂宴之日博陵崔公薨出紫薇直觀風甘棠下薨本傳拜中書舍人後出為陝州觀察

使卽記云觀風甘棠下也又敘新進士得意歸去多不伏
拘束假限往往閱試不悉集貢曹久未畢公事故地遠迨
一千里例不給口假唐摭言載唐一代進士之制未錄及
此也又載故事赤尉從相府得朱紱殿中此縣尉得侍御
史之由史志並缺錄誌內出將句旁注去聲始知有病旁
注句字甚矣旁注句字皆金石例所無

尊勝陀羅尼幢記

僧崇厚正書中和四年十一月在亳州叢林護國寺

尊勝陀羅尼經幢記首題云宣武軍亳州南護國禪院立
唐宣武軍節度使治汴州管汴宋亳穎四州故此記以軍
額統州名也其文序自乾符二年草賊王仙芝尙君長黃
巢等結聚羣克煞戮萬姓莫知其數突入京國後却返淮

陽北下寨約百萬餘衆討伐州縣燒劫鄉閭攻圍當郡
我當使司空當州尙書口口口共召集勇將剋口口殺口
其衆大敗是散諸處例皆斬首獻上天廷口萬姓再獲口
口骨肉團圍重啟生涯悉皆樂業軍人百姓等遂各捨資
帛造佛頂尊勝陀羅尼幢一所上答聖恩用資榮福時中
和四年歲次甲辰十一月六日建案仙芝與君長倡亂濮
陽黃巢從而附起旣陷京師敗退返淮陽北下寨與秦宗
權復寇陳州已當中和三年卽記所謂也舊唐書僖宗紀
三年六月黃巢與宗權合從縱兵四掠遠近皆罹其酷意
當時蓋遣羣孽復擾亳州故記有攻圍當郡之文而巢本
傳惟言與仙芝爲形援及仙芝敗東攻亳州不下其事當

乾符五年非此記所指記云賴我當使司空當州尚書紀稱以檢校尚書右僕射華州刺史潼關防禦等使朱温檢校司空兼汴州刺史充宣武軍節度觀察等使然則當使即宣武軍節度于時温已檢校司空矣當州即州刺史尚書云者亦以其檢校官稱之唐書紀光啓三年六月亳州將謝殷逐其刺史宋衮以時按之距中和四年未遠疑當州者為衮也記又云其眾大敗星散諸處例皆斬首獻上天廷皆由當使當州募勇將促之於死攷紀載中和四年四月沙陀兵攻太康西華賊砦尚讓黃鄴遁去黃巢亦退保鄆城及巢渡河又得徐州將李師悅陳景思追之及朱瑄敗之而後授首全忠不與謀後檢五代史梁本紀全忠

及克用追敗之于鄆城云則此記歸功當使非無謂也

記後列施主諸人名在記文之下有團練副使銀青光祿

大夫檢校右散騎常侍右監門衛將軍兼御史大夫上柱

國李茂彰節度押衙充馬步都虞候銀青光祿大夫檢校

國子祭酒兼御史大夫上柱國謝殷節度散兵馬使團練

押衙充順天高貴兩都都兵馬使銀青光祿大夫檢校國

子祭酒兼御史大夫上柱國郭王似瑒字節度散兵馬使

口遊奕都知兵馬使銀青光祿大夫檢校太子賓客兼御

史大夫上柱國孟從益節度衙前散兵馬使充押衙管將

銀青光祿大夫檢校國子祭酒兼御史大夫上柱國陳全

約節口口兵馬使團練押衙管將充都教練使銀青光祿

大夫檢校太子賓客兼御史大夫上柱國張崇節度兵馬使充團練押衙管將銀青光祿大夫檢校賓客兼御史大夫上柱國李仁邵節度散兵馬使團練押衙充防遏都銀青光祿大夫檢校太子賓客兼御史中丞孫從遠節度散兵馬使充團練押衙口將銀青光祿大夫檢校太子賓客兼侍御史上柱國名同節度副使充押衙管口營將銀青光祿大夫檢校太子賓客兼殿中侍御史上柱國名後間行書押衙管將兼殿中侍御史陳實兵馬使魏同餘多不具錄案却掃編云至德後自方鎮及賓佐幕職下逮卒伍之長莫不領中丞大夫御史之名名器之濫莫甚於此卽此題名所記矣謝殷見新書僖宗紀孟從益見舊書僖宗

紀光啟三年五月詔以汴將孟從益權知鄭州事從益爲汴將而列名于此于是推諸有銜位者皆宣武所屬四州之將也又官制不見于史志者節度散兵馬使節度衙前散兵馬使團練押衙團練押衙管將充都教練使之屬皆以唐季傾攘因事權置其名不可悉錄耳充順天高貴兩都兵志載僖宗幸蜀田令孜募神策新軍爲五十四都此必其二名矣然此記列銜十人階皆銀青而勳爲上柱國者有九吕和叔代鄭相國謝賜戟狀所云吏考三十始秩銀青戰勳十二乃號柱國蓋其始立制爲重慎而漸積至于猥碎國是豈不日紊也與

重藏舍利塔記

正書沙門南敘撰僧知常書景福元年十二月在京師法源寺

碑序隋仁壽二年正月勅天下大州一百處置舍利塔時
幽州節制竇抗創造五層大木塔飾以金碧扇舍利于其
下舊唐書列傳抗母卒歲餘起爲岐州刺史轉幽州總管
政並以寬惠聞記稱幽州節制者卽傳所云總管也後又
稱太和八年天火焚塔至宣宗丙寅歲勅修廢藍得石函
于故基下時清河公曉示人天傳觀供施遷藏于憫忠寺
多寶塔下後中和二年又值火災隴西令公大王巨崇像
設造觀音閣遂遷舍利于閣內觀音像前其略如是記內
于前後節使皆空格跳行書之不敢斥其名氏而于丙寅
及故基字不爲國諱僧徒庸頑昧于大義可慨也

蜀王師蓋文達碑

正書貞觀二十二年

碑首題上柱國燕國公于志寧字處謐作此文惜文多泐
漉舉其所載歷官始末有云正議大夫蜀王師蓋公諱文
達字藝成異州信都人曾祖慶魏彭成王託室參軍樂陵
郡守祖延齊安平王計曹從事父永隨幽州薊縣令又云
公以經明行修孤標獨秀大業三年授同安博士九年特
敕除守國子助教武德元年授國子助教又云今上紹光
藩服云後又以公學冠當時除國子博士十年詔授員
外散缺諫議大夫國子博士如故十一年從駕洛陽宮補
宏文館學士十二年詔授國子司業十三年詔授兼蜀王
師十六年丁母憂十八年詔授正議大夫兼崇賢館學士
春秋六十有七薨雍州開化坊里第卽以其年十二月歸

葬於舊塋舊唐書本傳文達字及三代名銜在隨時文達
所居官並略不書唐書同又十一年補宏文館學士傳載于

十年十二年詔授國子司業傳載于十三年叙次失其實
當依碑為正前云仁風表於弦哥哥古歌字後稱世子國

子主簿宏式口世字不缺書

贈邛州刺史狄公神道碑正書在洛陽平樂北

碑舊見於金石補遺僅著其目予頃乃拓一紙攷其事跡

尚可撮舉相屬碑首言周封孝伯因受氏于狄城與宰相

世系表稱孝伯封于狄城因以為氏合碑言樂平公出將

入相豹變于秦庭與表稱後秦樂平侯合碑言曾祖叔湛

魏平西將軍臨邑子與表稱湛東魏帳內正都督臨邑子合

但碑載叔湛較表多一泝字碑言父孝緒唐行軍總管太

將軍金紫光祿大夫尚書左丞使持節汴州諸軍事缺與

表稱尚書左丞臨穎男合碑言公即臨穎公之第五子也

又歷官可見者鄭州司兵叅軍兼鄭王府兵曹叅軍缺授

口口梁州都督府錄事叅軍缺俄改越州剡缺授鄭州鄭

縣令缺除夔州都督府長史缺贈使持節邛州諸軍事邛

州刺史下言嫡子故口書令尚書右僕射贈司空梁國文

惠公据是則碑為梁公之父知遜也然表載孝緒三子知

遜即居三而碑以為第五子表載知遜越州刺史而碑以

為贈邛州刺史前雖為越州剡縣寃非任為刺史疑表文

誤往時洛陽令王君宇嘗為溧陽狄氏訪其先墓得梁公

碑于草間遂豎置白馬寺東偏因封樹焉不知狄氏先墓
固在平樂北山上俗名雙碑凹者以此也他日獲遇狄氏
當詳告之

張孝孫華嶽題名

右題名正書自左起文云銀青光祿大夫殿中監缺將軍

左金吾衛大將軍缺節度副使元從鎮國大缺潼關節度

都虞候張孝孫恭謁靈祠案元從之號唐世凡三見新唐

書兵志初高祖以義兵起太原已定天下悉罷遣歸其願

留宿衛者三百人高祖以渭北白渠旁民棄腴田分給之

號元從禁軍李晟傳時肅宗紀有蜀郡靈武元從功臣德

宗紀興元元年四月壬寅詔奉天隨從將士並賜號元從

功臣兵志自德宗幸梁還以神策兵有勞皆號興元元從
奉天定難功臣今題名所記已失其年月或為肅宗所賜
及德宗所號皆未可知也

將羅漢題名

右題名正書無年代文云內供奉開國公上柱國賜紫金

魚袋將羅漢並舊唐書周智光傳判官監察御史邵賁都虞

候將羅漢並誅疑此題即其人然則羅漢殆叛黨也羅漢

之誅在大歷二年正月密詔討智光時是此題又當大歷

前矣

寶華題名

右題名正書在青州無年月益都段赤亭拓以見遺其文

自左起缺州觀察處置押新羅渤海兩蕃等使金紫缺兼

青州刺史御史大夫上柱國韓國缺部員外郎兼侍御史

內供奉賜緋魚袋竇鞏缺裏行韋會缺上柱國齊孝宏缺

儀郎薛華士缺方回鞏見舊唐書列傳平盧薛平辟為副

使入朝拜侍御史憲宗紀元和十四年三月己丑以義成

軍節度使薛平為青州刺史充平盧軍

節度淄青齊登萊韓昌黎竇牟燕誌載鞏亦進士以御史

等州觀察等使佐淄青府注孫曰元和十四年三月以薛平為平盧淄青

節度使表鞏自副與舊唐書傳合然則鞏以佐幕至青在

元和十四年矣攻押新羅渤海兩蕃等使名代宗紀大歷

十年二月以平盧淄青節度觀察海運押新羅渤海兩蕃

等使德宗紀興元元年淄青節度使承前帶陸海運押新

羅渤海兩蕃等使宜令李納兼之据此題亦有押兩蕃之

名當亦以淄青節度兼之則於時為節度使者薛平也前

列銜缺名意即其人與

司空圖不全詩句

右詩存者惟有岳前大旆討淮西從此中原息戰鞏二句

按此為司空圖視晉公赴敵淮西題名紀之一絕也晉公

題名亡佚不可見今詩石又斷下二句矣說見王定保唐

據言又全唐詩話亦載此詩云大順中戶部侍郎司空圖

紀者然則題詩年代猶可攷也首句大旆作大隊討淮西

作赴淮西皆與石本異文

南詔蠻頌德碑正書

碑拓本由青浦王少司寇官雲南布政使日搨得之攜以贈余余按是碑殘滅過甚其句有可屬者云春命長男鳳伽異舊唐書傳鳳伽異閣羅鳳子也閣羅鳳北臣吐蕃吐蕃令閣羅鳳為贊普鍾號曰東帝給以金印蠻謂弟為鍾時天寶十一載今碑稱聖神天帝贊普當以吐蕃所號而更加之微稱蠻會誕妄至此傳失載其事案新唐書南詔傳載會龍死偽諡景莊皇帝子法嗣法死偽諡聖明文武皇帝不知其先已稱神聖天帝矣後銘詞兼瓊秉節貪榮構亂開路口口政戈東熹賴我先王懷母伏叛先王謂皮邏閣也文獻通攷南詔居永昌姚州之間鐵橋之南東距熹東即此東熹也本傳稱劍南節度使章仇兼瓊遣使至

雲南與歸義言語不相得歸義常銜之銘言貪榮構亂蓋

指其事銘稱仲通口節不詢長口徵兵海口顧口江口謀

口不臧帥師夜走仲通即鮮于仲通也舊唐書傳仲通率兵戎

嵩州閣羅鳳遣使謝罪仲通不許囚其使進軍逼太和城

為南詔所敗是也銘又稱李宓惣戎猶尋覆轍水戰陸攻

援口踵致勢屈謀弱本傳天寶十二年劍南節度使楊國

忠執國政仍奏徵天下兵俾留後待御史李宓將兵十餘

萬輦餉者在外涉海瘴死者相屬于路天下始騷然苦之

宓復敗于太和城北死者十八九會安祿山反閣羅鳳乘

釁攻陷嵩州及會同軍西復降尋傳蠻即銘稱叩盧一掃

軍郡雙滅觀兵尋傳舉國來賓者也其事與碑符合足為

徵信不誣碑年月脫損据有閣羅鳳攻陷嵩州在安祿山
反時是碑之立亦當于天寶十五載後矣錢少詹事跋大
禮國鐘題字謂滇中無古今石刻此猶唐時所鑄得之亦
足以豪然鐘識題建極十二年不過當懿宗咸通十二年
此碑猶在前也碑與磨厓題名皆一人書惜殘缺不得其
名氏而書法之秀整唐刻工書者無以過也

南詔磨厓題名

正書無年月

磨厓題名殘剝不完其字文可見者缺袍金帶段忠國缺
清平官大軍將大金告身賞錦袍金帶兼缺官大缺清平
官缺虫皮衣楊傍佺清平官小頗彌告身賞錦袍金帶王
頗彌告身賞二色綾袍金帶缺守缺清平官大軍缺段

昌缺

李缺

大將軍開南城大將軍

缺

大大虫皮衣趙

邱缺

大將軍士曹長大頗彌

缺

賞紫袍金帶

缺

皮衣楊

細缺

大將軍賞二色綾袍金帶玉琮羅鐸大軍將

缺頗彌

告身賞

缺

袍金帶兼大大虫皮衣張驃

缺

于大軍將前戶

曹長拓東

缺

大軍將

缺

告身賞二色綾袍

缺

綾袍金帶王

波鐸大軍將前法曹長大頗彌告身賞二色綾袍金帶楊

賞二色綾

缺

大軍將小金告身賞二色綾袍金帶楊羅

望大軍將小金告身賞錦袍金帶

金帶尹璫遷大軍將小金告身賞紫袍金帶楊龍棟

缺二

色

缺

棟附告身賞二色綾袍金帶尹附會大軍將賞紫

袍金帶趙璫羅望大軍將兵曹

缺

賞紫袍金帶趙逸羅

缺

缺 二色綾袍金帶兼大大虫皮衣孟綽望軍將士曹長小
 銀告身賞紫袍金帶楊鄧佺 缺 法曹長小頗彌告身賞二
 色綾袍 缺 楊利盛大軍將小銀告身賞二色綾袍金帶楊
 各會大軍將賞二色綾袍 缺 細利 缺 客曹 缺 小銀告身賞
 缺 賞二色綾袍金帶 缺 羅疋大軍將兵曹長小頗彌告身
 賞紫袍金帶段君利大軍將 缺 小銀告身賞 缺 金帶 缺 大
 軍將小銀告身賞二色綾袍金帶 缺 大軍將小銅告身 缺
 綾袍金帶周 缺 二色綾袍金帶唐酋統大軍將賞紫袍金
 帶喻酋苴大軍將賞二色綾袍 缺 缺 倉曹長小銀告身賞
 二色綾袍金帶兼大大虫皮衣張盛顛大軍將賞紫袍金
 帶楊 缺 缺 大總管小銀告身賞二色綾袍金帶大大虫

皮衣 缺 軍將前 缺 綾袍金帶洪羅棟大總管小銅告身賞
 二色綾袍金帶 缺 軍將 缺 色綾袍金帶段旋忙湊軍將戶
 曹長小銅告身賞紫袍金帶 缺 大總管 缺 忙湊軍將羣牧
 大使小銀告身賞紫袍金帶楊瑳白奇 缺 兼知表誥小銀
 告身 缺 楊 缺 銅 缺 和大總管兼押衙小鑰石告身賞二色
 綾袍金帶石賢大軍將小銀告身 缺 段 缺 邏 缺 帶李奴郡
 客曹長賞紫袍金帶王 缺 大軍將小頗彌告身賞 缺 帶 缺
 諾地 缺 頗彌告身賞紫袍金帶阿忍大軍將賞紫袍金帶
 缺 本大軍將小頗彌 缺 大軍將 缺 二色綾袍金帶黑紫羅
 大軍將賞紫袍金帶 缺 大司編賞紫袍金帶孫白伽軍將
 缺 鑰石賞紫袍 缺 軍將賞紫袍金帶兼大大虫皮衣劉望 缺

喻軍將賞紫袍金帶缺衣缺軍將前兵曹判官小銅告身

賞紫袍金帶杜顛伽缺袍金帶兼缺大軍將賞缺趙充

缺軍將兵曹副小銀告身賞紫袍金帶缺軍將缺賞缺

盛軍將士曹副賞紫袍金帶楊鄧四羅缺袍金帶缺瑤龍

缺軍將木鑰石告身賞紫袍金帶段缺袍金帶缺金帶

張羅缺軍將缺伽瑳軍將賞紫袍金帶楊潯波羅缺身賞

缺軍將儼人佐楊羅斂軍將賞紫袍缺袍金帶尹求寬

缺金缺楊缺賞紫缺將賞紫袍金帶張缺軍將賞缺金帶

缺軍將賞紫袍金帶缺紫袍金帶缺小銅告身缺斂詔親

大軍將大金告身賞二色綾袍金帶李外成苴缺軍將兼

白崖城大軍將大金告身賞二色綾袍李缺詔親大軍將

小銀告身賞二色綾袍金帶李些豐潯缺詔親大軍將賞

二色綾袍金帶放苴缺詔親缺小金告身賞錦袍金帶獨

磨按南詔諸官結銜多與唐制符攷舊唐書南詔蠻傳載

其官制甚略惟云蠻謂相為清平官凡置六人新唐書官

曰坦綽曰布燮曰久贊謂之清平官所以決國事輕重猶

唐宰相也此記題清平官凡四見最列在前蓋即舊史所

云置六人也又稱大軍將者至二十餘人本傳所載有此

官其餘以大軍將兼開南城大軍將拓東大軍將白崖城

大軍將者凡三人又單稱軍將及忙湊軍將大總管羣牧

大使兼知表誥兼押衙大司編儼人佐新舊史文獻通考

四裔攷皆未之及傳言有六曹長此題稱士曹長戶曹長

法曹長兵曹長客曹長倉曹長與數相符而每曹之屬有副有判官見于此題者尚有兵曹判官一人兵曹副士曹副各一人則亦不能具錄矣傳載自曹長以降繫金佻苴尚絳紫有功加錦文獻通考載舍龍生細奴邏唐高宗遣使者入朝賜錦袍開元末皮邏閣亦賜錦袍金鈿帶七事正與此同又有功加金波羅金波羅虎皮也此題稱賞錦袍金帶賞二色綾袍金帶賞二色綾袍金帶玉琮賞大大蟲皮衣賞紫被金帶兼大大蟲皮衣與史符合史稱邏盛至京師賜錦袍金帶歸國亦因其俗所尚而寵之惟虎皮稱大蟲與史言金波羅者微異題名以告身入銜亦南詔舊制其告身等差有大金告身小金告身大頗彌告身小

頗彌告身小銀告身小銅告身小鋤石告身大鋤石告身亦宜取以資異聞也題刻稱地名拓東傳載六節度曰弄棟永昌銀生劍川拓東麗水此其一也廣德初鳳迦異築拓東城此時猶未有城故開南白厓皆名城而此唯名拓東蓋書其實如此又白厓城傳稱白厓驗夷語驗若州又載異牟尋破施蠻順蠻并虜其王置白厓城卽是地也此題名有尹附酋傳載德宗遣袁滋册封異牟尋及滋還復遣清平官尹輔酋等七人謝天子卽其人而石刻以輔作附尹求寬傳云遣清平官尹仇寬廿七人入獻地圖請復號南詔帝賜賚有加拜仇寬左散騎常侍封高溪郡王者是也而以求作仇譯音無定字題名時二人官位未顯至

此遂遷用爲清平官矣碑載洪羅棟傳以洪作湊或別爲一人忙湊傳作蒙湊史記秦本紀擊芒卯華陽索隱引譙周云孟卯也芒與孟通亦與蒙通音近則相轉也文獻通考或謂夢湊自稱驃信夷語君也最後題詔親者三人蠻謂王爲詔當是王之親屬因以結銜別于疎遠若此

馬公神道碑

正書在洛陽平樂北山

碑四面書字篆額陰文凸起題云唐馬公神道碑正文已殘剝惟前稱京兆杜光泰撰顯存又碑言公諱承光高祖諱行感又言公少時學擊劍歷官內有衛尉少卿字蓋以武功致顯仕惜未審其實也前著錄者不之及

魏公先廟碑銘

正書

碑斷缺据金石錄載爲崔絢撰柳公權正書大中六年十一月余檢其句意相屬者証之舊唐書魏謩傳宣宗大中年謩兼戶部侍郎判本司事今碑題有判戶部事字與史相符碑稱特進侍中贈太尉鄭國文貞公魏氏在貞觀立家廟案魏徵傳但云贈司空其特進侍中贈太尉皆不及碑載府君諱異謩本傳云父馮獻陵臺令傳以異爲馮宰相世系表亦同其舛碑載謩始以大理評事兼監察換殿中侍傳惟稱謩內徵爲給事中則於前以大理評事兼監察諸官失之過畧矣傳遷御史中丞尋以本官司平章事與碑言兼領邦憲又間歲進陟公台合至碑所云會昌中權倖惡忌擠之外郡卽傳謂謩坐楊李之黨出爲汾州

刺史也纂文題曰博陵縣開國子食邑五百戶賜紫金魚袋崔名已殘剝攷文內稱使門吏左補闕鄭愚口謂璵以銘功述德云者蓋即崔璵也璵傳稱大中七年權知戶部侍郎進封博陵子食邑三百戶此題已有博陵縣開國子字則碑當亦作於是時或更後于是而金石錄既以為崔絢又謂當大中六年當皆傳刻訛易也

淮南節度使李珣神道碑

正書在偃師兩程書院

碑久佚無考今始搜出已厄于前明妄人鑿斷鐫治二碑額推尋可辨者篆額唐故淮南節使贈司空口郡李公神道碑十六字郡上缺字以珣傳補之是為趙字也文內有出為下邳令拜殿中字及文宗山陵使字新唐書珣本傳

以數諫不得留出為下邳令武昌牛僧孺辟署掌書記還為殿中侍御史遷門下侍郎為文宗山陵使皆與碑合傳蓋依之為文故于舊書較詳王澤長續修縣志淮陽節度使李珣墓在治西北有墓碑即指此然不知碑已毀于前明而附會書之也碑無年月可見舊唐書傳珣大中七年卒碑之立蓋益後矣

重修法門寺塔廟記

正書天祐十九年二月在岐山縣

記首題朝請大夫守尚書禮部郎上柱國賜紫金魚袋薛昌序撰後題承旨王仁恭書其稱秦王謂李茂貞也舊唐書昭宗紀景福二年十一月制以鳳翔節度使李茂貞守中書令進封秦王是也茂貞本姓朱僖宗賜性李氏記所

稱天潢稟異帝裔承榮蓋指其事法門寺見韓愈傳云鳳
翔法門寺有護國真身塔此所重修塔意即其遺跡與記
稱天祐十九年歲次壬午前又以天復紀年至二十年參
差無統唐之正朔亡矣歷代紀元彙攷于梁開平元年書
岐王天祐四年証之此碑仍稱自天復元年及十二十三
十四十九廿年皆以天復紀號是當梁之篡唐未嘗以天
祐紀推其誤蓋沿于通鑑謂唐之亡惟河東鳳翔淮南稱
天祐也

授堂金石文字續跋卷六終

受業汝陽李應會校

授堂金石文字續跋卷七

偃師武億虛谷著

男穆淳編

孫未重校刊

後梁匡國軍節度使馮行襲德政碑

正書無年
月在許州

碑殘剝前列翰林學士奉旨及工部侍郎字案舊五代史

馮行襲傳太祖郊禋行襲請入覲貢獻巨萬恩禮殊厚尋

詔翰林學士杜曉撰德政碑以賜之此題翰林學士者即

杜曉也歐史梁紀開平三年春正月辛卯有事於南郊後

書九月翰林學士充承旨工部侍郎杜曉同中書門下平

章事据是則碑之賜立有工部侍郎字必當正月後及曉

九月前未轉戶部時矣傳紀並言承旨碑作奉旨以避梁

祖嫌名故也又題朝議大夫前光祿口卿上柱國缺李宏

懿書體勢規步率更深入其奧然當時不聞以書名何哉
行囊傳薛史云武當人歐史云均州人証之碑所書家遷
武當世緒紛綸是薛史据其遷時占籍言之而唐書僖宗
紀光啓元年四月武當賊馮行襲陷均州逐其刺史呂煜
並與碑稱武當合矣然則歐史爲非實也碑載有口喜者
聚千人及軍吏迎謁公在側擊之卽傳言伏兵伺孫喜事
又載烏鵲啄食麥秀兩岐字卽傳言境內嘗大蝗尋有羣
烏啄食不爲害民或艱食必有糴穀出於隴畝是也然二
事之異皆由天幸撰碑者承錄以爲德政所被遂至史亦
從而書之蓋不悟其以諛詞相誣也

贈太尉葛從周神道碑

碑紀從周戰功有云落落領二千騎缺馬步二千殺戮殆

盡生擒落落奪馬三千歐史本傳書晉王怒自將擊從周

從周雖大敗而梁兵擒其子落落送于魏斬之予向跋此

深以見歐史之誤今案舊唐書羅宏信傳太原怒舉兵攻

魏營于觀音門外汴將葛從周援之屯于洹水李克用子

落落時爲鉄林軍使爲從周所擒唐書宏信傳從周爲閻

竇每克用兵至輒出精卒薄戰必捷克用踰洹西北挑戰

從周大破之禽其子落落乃引去舊五代史從周傳乾寧

三年五月并帥以大軍侵魏遣其子落落帥二千騎屯洹

水從周以馬步二千人擊之殺戰殆盡擒落落于陣并帥

號泣而去紹威傳太祖遣葛從周援之戰于洹水擒克用

男落落以獻太祖合送于宏信斬之晉軍乃還推斯數証
舉足以見承叔曲說非信史矣碑云歸墓于偃師縣毫邑
鄉林口里之別墅今墓碑屹立如故而齊乘以東昌路之
聊城縣五代葛從周有墓土人名曰葛塊攷之未審貽此
誤也從周隸籍鄆城鄆與聊城相近當是其祖墓所在子
氏過信土人野夫之語豈非惑與

河東監軍張承業墓碑

同光元年勅立至元乙酉重刻在交城縣洪栢村

碑先經焚後為元張鼎新重勒立石已失書撰人氏名今
以碑按五代史承業本傳事跡畧同其勸晉王聽周德威
退保高邑及與安金全破梁兵二事則各見德威金全傳
不具錄也承業歷官碑稱光啟中主郟陽軍事賜紫入為

內供奉昭宗幸太原以為河東監軍幸華州就加左監門
衛將軍莊宗為晉王承制授開府儀同三司左衛上將軍
燕國公固辭不受但稱唐官終身今傳言初為河東監軍
卒贈武衛上將軍略之甚矣舊五代史實取承業碑文書
官紀事皆與之同而自離石渡河凌晨躡冰而濟旋踵冰
解歐陽以其事詭異削之不書是也碑題稱貞憲公傳作
諡曰正憲舊史與歐陽史避仁宗諱易之

鈞大德塔銘

正書同光四年二月在登封

銘前列京左街敬愛寺講維摩經沙門賜紫虛受撰後列
法孫欽緣書其文載行鈞俗姓閻氏鄭州陽武人年十有
四依會善寺西塔院法素禪師為和尚年滿受具于本寺

瑠璃壇自後廣明庚子歲住少林寺於同光三年七月廿
日示滅春秋七十八僧臘五十九蓋行鈞實生于宣宗大
中二年戊辰其間所閱世變多矣京左街敬愛寺者五代
會要後唐同光三年詳定云近以中興大業以魏州爲
京興唐府權名東都爲京故此題云京也

後唐

重修古定晉禪院千佛邑碑

正書天成四年九月在武安縣

碑沙門宗仁撰下截已斷缺中言定晉禪院以同光元年
七月起功至天成元年九月落成又引集異記云魏時有
大業僧凭戶岩邊有大桐樹本堅枝密其僧將法衣往樹
欲掛其間忽爾開而集之儼然掩合神力彌縫乃婚婦長

于二子後之人因號桐禪師之寺焉又言收得道具數件
乃是桐禪師口僧所用之物有單梯一條坐禪棚一所椅
子一隻蓋一頂案硯餘業攷引了晉公談錄寶儀雕起花
椅子二以備右丞及太夫人同坐王銍默記李後主入宋
後徐鉉見李取椅子相待以爲始自宋初不知後唐時已
有此坐具矣正名原始博稽當得其所自予故于此不敢
苟也

後晉

尊勝經幢

正書

幢八面鐫字後題天福二年八月廿八日邑主住持僧等
諸名內惟二人題云焦長官焦校書五代時人多有此號

今獨施于二焦必其邑里之豪也又作四言數語類贊類
傷他經幢亦未見

羅周敬墓誌銘

正書天福三年十月
在洛陽東二十里鋪

誌石出土當庚戌歲七月洛水北溢冲激崖岸墓陷於水
惟石爲土人移置僅存予案誌文稱周敬曾祖讓皇檢校
司空累贈太師封南陽王薛史失其名歐史亦不著其官
階祖宏信皇天雄軍節度使檢校太師兼中書令長沙王
累贈守太師累封趙王諡曰莊肅薛史載宏信累官至檢
校太尉封臨清王歐史僅書爲節度使
新唐書宏信傳徙
臨清郡王又追封
北平王誌言紹威有子四人長廷規天雄軍節度副大使檢
校太傅駙馬都尉贈侍中次周翰義成軍節度檢校太傅

駙馬都尉次周胤前保大軍行軍司馬檢校兵部郎中兼

御史大夫柱國賜紫金魚袋書官並較史爲詳然周翰史

載爲宣義軍節度使誌稱爲義成職方考滑在梁稱宣義

唐改爲義成周翰官於梁而誌以唐代遷易之鎮名書之

於事爲失實次卽周敬字尙素初授檢校尙書禮部員外

郎仍賜紫金魚袋權知滑州軍州事檢校禮部尙書尋授

宣義軍節度檢校尙書右僕射薛史所云命爲兩使留後

尋正授旌鉞正指其事而檢校尙書右僕射則無此文又

移鎮許田加檢校尙書左僕射又授檢校司空守殿中監

駙馬都尉薛史授秘書監與殿中監文亦小異入唐當莊

宗時封開國侯加食邑三百戶明宗除右金吾大將軍充

街使遂轉左充使如故授匡國軍節度使加檢校司徒仍
賜耀忠匡定保節功臣加檢校太保除左監門衛上將軍
轉左領門衛上將軍轉左武衛上將軍入晉除右金吾上
將軍薛史載莊宗卽位歷左右金吾大將軍据誌文則莊
宗但封侯加邑明宗始除右金吾又轉左耳周敬在梁移
鎮許田史言忠武此亦唐改軍號而史以加於梁臣蓋錯
紀也史載長興中人爲左監門衛上將軍四遷諸衛上將
軍當以始除及入晉凡四遷而功臣賜號史不及之周敬
兄弟四人竟脫周亂不錄皆宜依誌文爲据周敬尙普安
公主兩史皆作普安與誌所書符誌前列朝請大夫行起
居郎充史館修撰柱國殷鵬撰并書薛史鵬字大舉大名

人爲右拾遺歷左補闕考功員外郎充史館修撰與此題
合其階勲失書也又誌言周敬之墓在洛陽清封鄉積澗
村今誌石所出直石嘴之西數十步蓋於墓地猶可攷而
五代墟聚之名亦以附傳於後金石豈惟補史闕文哉

復溪州銅柱記

正書天福五年七月

碑前鐫天策府學士江南諸道都統掌書記通議大夫檢
校尙書左僕射兼御史大夫上柱國賜紫金魚袋李宏臬
撰宏臬卽馬希範依其父殷所置學士十八人之一也宏
臬史皆作臬避宣祖諱刪之舊五代史希範傳晉天福中
授江南諸道都統又加天策上將軍谿州洞蠻彭士愁寇
辰澧二州希範討平之士愁以五州乞盟乃銘于銅柱希

範自言漢伏波將軍援之後故鑄銅柱以繼之歐史溪州刺史彭士

然率錦獎諸蠻攻澧州希範遣劉勃劉全明等以步卒五千擊之士然大敗勃等攻溪州士然走獎州遣其子師高

率諸蠻酋降于勃溪州西接牂柯兩林南通桂林象郡希範乃立銅柱為表命學士李臬銘之今記文稱

我烈祖昭靈王漢建武十八年平徵側于龍編樹銅柱于

象浦是其事也記文吳任臣十國春秋全見宏臬傳案記

文五溪初寧傳作初輯式昭恩信傳作或昭恩德載叙厥

事傳作敬載厥事蓋聞牂柯接境盤瓠遺風因六子以分

居人五溪而聚族傳作牂柯接境五溪遺風洎師號精天

傳作師號滑服漢則宋均置吏稍靜溪山唐則楊思與師

遂開辰錦傳作宋均甫肇靖溪山楊興師遂開展境溪州

彭士愁傳作彭士然故能歷三四代長千萬夫傳歷作立

千作百亦不虐于小民記亦作必剽掠耕桑傳剽作擾

創丕基傳肇作大方振聲明傳明作名各請効命傳作名

効命土付以偏師傳付作土結寨馮高傳寨作阻固甘矜

甲豈暇投戈傳脫豈暇投戈惟作因甘矜恤彭師臬作嵩

崇侯感德以歸周傳作崇虎就加檢校太保傳無就字底

平疆理傳作居平荷君親之厚施傳作厚德垂于子孫傳

作予敢忘賢哲之蹤傳敢作可我王鑄柱庇黔黎傳我王

作誕今五溪之衆不足馮傳馮作平溪人畏威仍感惠傳

作思納質納質歸明求立誓傳作棄污歸口案任臣依記

文為傳蓋未收銅柱元文所据名山記及廖道南楚紀或

近方志所載是以脫謬至此也記後勒誓詞與彭氏官屬

受堂

銜名任臣亦未收尋具錄如左

誓文

天福五年正月十九日溪州刺史彭士愁與五姓歸明衆具件狀歛血求誓楚王畧其詞鐫銅柱之一隅右據狀溪州靜邊郡自古已來代無違背天福四年九月蒙王庭發軍收討不順之人當都願將本管諸團百姓軍人及父祖本分田塲土產歸明王化當州大都三亭兩縣苦無稅課歸順之後請祇依舊額供輸不許管界團保軍人百姓不許亂入諸州四界劫掠該盜逃走戶人凡是王庭差網收買溪貨并都幕採伐土產不許輒有庇占其五姓生首州縣職掌有罪本都申上科懲如別無罪名請不降官軍攻

討若有違誓約甘請准前差發大軍誅伐一心歸順王化永事明庭上對三十三天明神下將宣祇爲證者王曰爾能恭順我無差徭本州賦租自爲供贍本都兵士亦不抽差永無金革之虞克保耕桑之業皇天后土山川鬼神吾之推誠可以元鑒

題名

靜邊都指揮使金紫光祿大夫檢校太保使持節溪州諸軍事口溪州刺史兼御史大夫上柱國隴西縣開國男食邑三百戶彭士口武安軍節度左押衙金紫光祿大夫檢校司徒前溪州諸軍事守溪州刺史兼御史大夫上柱國彭師佐武安軍節度左押衙前砂井鎮遏使三井都管使

銀青光祿大夫檢校尙書左僕射兼御史大夫上柱國龔
朗芝武安軍節度左押衙銀青光祿大夫檢校尙書左僕
射兼御史大夫上柱國田宏贊武安軍節度衙前兵馬使
前溪州左廂都押衙銀青光祿大夫檢校太子賓客兼御
史大夫上柱國向宗彥武安軍同節度副使攝溪州司馬
銀青光祿大夫檢校左散騎常侍兼御史大夫上柱國覃
彥仙武安軍節度副將充溪州知後官銀青光祿大夫檢
校國子祭酒兼御史大夫上柱國朱彥口武安軍節度左
押衙口江都指揮使知使防遏營金紫光祿大夫天檢校司
徒前溪州諸軍事守溪州刺史兼御史大夫上柱國彭允
瑫武安軍節度左押衙金紫光祿大夫檢校司徒前溪州

諸軍事守溪州刺史兼御史大夫上柱國田倬暉武安軍
節度左押衙充溪州副使銀青光祿大夫檢校尙書左僕
射守溪州三亭縣令兼御史大夫上柱國彭師俗武安軍
節度左押衙左義勝第三都都將銀青光祿大夫檢校刑
部尙書前守富州別駕兼御史大夫上柱國彭師杲武安
軍節度同十將前溪州左廂都虞侯銀青光祿大夫檢校
太子賓客兼監察御史上柱國龔貴武安軍同節度副使
前攝大鄉縣令銀青光祿大夫檢校左散騎常侍騎兼御
史大夫上柱國覃彥富武安軍節度左押衙充靜寇都指
揮使金紫光祿大夫檢校司徒前溪州諸軍事守溪州刺
史兼御史大夫上柱國田宏祐武安軍節度左押衙充砂

并鎮遏使銀青光祿大夫檢校尚書左僕射兼御史大夫
上柱國彭師樞武安軍節度左押衙充金澗里指揮使銀
青光祿大夫檢校尚書左僕射兼御史大夫上柱國覃彥
勝武安軍節度討擊副使左歸義第三都都將銀青光祿
大夫檢校左散騎常侍兼御史大夫上柱國彭師口前溪
州大鄉縣令將仕郎試大理評事兼監察御史賜緋魚袋
彭允臻武安軍節度攝押衙充靜寇都副兵馬使銀青光
祿大夫檢校右散騎常侍兼御史大夫上柱國田思道又
有于記文內攢空題名前二人官最顯皆彭氏名已毀其
可見者有知狹州軍州事彭君庸知忠彭州軍州事彭文
綰知南州軍州事彭光明知州彭文儵團鍊彭如遷前三

亭縣令彭如喜三亭縣令彭文雅都監彭文威溪州都監
彭如興溶州都監彭士明統軍使彭如武都揮指使彭文
仙知萬州軍州事田彥存高州巡檢使彭如聰巡檢彭如
品中洞彭如熹統軍彭仕進排軍指揮使陳文綰巡檢朱
繼顯教鍊使屈思靜邊都指揮使彭文勝溪州軍事推官
辛白湘州羅文瞻史軍羅元能巡檢羅萬貴錄事叅軍廖
保詡口南都指揮使羅文彥金唐縣田成益教鍊使彭進
溪州知州彭君善鈐轄覃萬福五都彭如亮推誠奉節宏
義功臣天策府都尉武安軍節度副使判內外諸司使永
州團練使光祿大夫檢校大傅使持節永州諸軍事永州
刺史兼御史大夫上柱國扶風縣開國侯食邑一千戶馬

希廣奉教監臨鑄造五溪巡檢使知向化州彭如會知保
靜州軍州事彭光陵知來化州軍州事彭允會知感化州
軍州事覃文綰團鍊向行仙古州覃萬貴五溪都招安巡
檢使田思備左衙龔貴朋知永州軍州事彭君昌溪洞巡
檢使知武寧州軍州事彭口知富州軍州事覃文勇知謂
州軍州事覃允贊知州朱口通知州符彥貴轄鈐彭如權
鈐轄覃文見知州田彥勝通判田彥強知州田思趙施西
知州彭允強案馬希廣彭師杲二人並見歐史希廣字德
丕希範同母弟師杲卽士愁子史以愁爲然杲爲景非也
當依碑爲正十國春秋廢王世家書希廣當文昭王時不
著其官師杲傳官亦畧証之此碑題銜皆足補遺又州名

狹州忠彭州南州高州湘州向化州保靜州來化州感化
州古州謂州縣名如金唐官制其職事者大理評事錄事
叅軍知軍州事別駕鈐轄團鍊都監巡檢司馬左義勝第
三都都將左歸義第三都都將靜寇都指揮使副兵馬使
靜邊都指揮使節度副將知後官知使防遏營節度衙前
兵馬使節度左押衙溪州左廂都押衙左廂都虞候金澗
里指揮使砂井鎮遏使三井都管使巡檢使排軍指揮使
教練使討擊副使都招安巡檢使統軍使同十將知軍州
諸名地里表百官表概未之收也

後周

衛州刺史郭進屏盜碑

正書杜韓撰孫崇望書
在汲縣顯德二年五月

碑無刻缺予撮其事迹蓋由衛州士庶列狀以聞述去盜
之由稱守臣之美上可其奏命之刊勒乃勅朝請大夫行
右補闕柱國臣杜韡序而銘之郭進見東都事略進仕周
改登州刺史郡多寇盜進悉爲翦除吏民願紀其事命近
臣撰文賜之改刺衛州河朔盜匿汲郡山間者稍衆聞出
攘奪久不能滅進往攻剿絕之民以安居於是郡民又請
立碑紀其事改洺州團練使有善政郡民又請立碑詔左
拾遺鄭起爲文以賜宋史本傳同此碑所云士庶列狀以聞正
與相符又碑云初刺乎坊磁又遷於淄登衛今東都事略
及宋史惟言由登刺衛而前此之爲坊磁淄三州皆不詳
也碑首題大周推誠訥戴功臣金紫光祿大夫檢校司徒

使持節衛州諸軍事衛州刺史兼御史大夫上柱國太原
縣開國男食邑三百戶亦史所未詳碑待置仕郎守司農
寺丞孫崇望書字爲行體金石文字記以爲正亦誣

任公屏盜碑

行書顯德三年
閏九月在鉅野

碑前列朝議郎行左拾遺充集賢殿修撰李昉奉勅撰翰
林待詔朝議大夫行司農丞張光振奉勅書末列軍司判
官朝議郎試大理司直兼殿中侍御史張穆篆額金石例
篆額皆與撰書人並此獨居後以前二人奉勅爲之碑載
粵嗣位元年冬十月詔以前趙州刺史任公檢校太保牧
于濟公名漢權蜀國人以武略仕累朝其加號爲推誠奉
義翊戴功臣階爲特進官爲使持節濟州諸軍事行濟州

刺史兼御史大夫勲爲上柱國爵爲西河郡開國公食邑二千三百戶至其功略所著皆未有詳徵惟以屏盜列之豐碑則其時所尙若此可悲也已

中書侍郎景範碑

行書顯德三年十二月在鄆平縣南五里

碑首列翰林學士朝議郎尙書水部員外郎知制誥扈載撰翰林待詔朝議郎守同農寺丞孫崇望奉勅書文多剝缺案舊五代史景範傳云官爲立碑卽此是也碑載故中書侍郎平章事景公諱範又載上柱國晉陽縣開國伯及贈侍中字後載今皇帝嗣位登用舊臣及以列卿歸第懸車故鄉嗟風樹之忽驚字又載冬十一月薨于淄川郡之私第

下

周太祖紀廣順三年春三月以左司郎中充樞密

直學士景範爲左諫議大夫充職世宗紀顯德元年七月癸巳以樞密院學士工部侍郎景範爲中書侍郎平章事碑謂登用舊臣蓋範當太祖時已爲諫議矣碑言晉陽縣開國伯冊府元龜載世宗卽位七月制詔範爲晉陽縣開國男當依碑作伯又碑言以列卿歸第案本傳云範理繁治劇非其所長雖悉心盡瘁終無稱職之譽世宗知之因其有疾乃罷司計尋以父喪罷相東歸並與碑相符

授堂金石文字續跋卷七終

受業亳州何承道

授堂金石文字續跋卷八

偃師武億虛谷著

男穆淳編

孫未重校刊

宋佛項尊勝陀羅尼經幢記

正書乾德元年三月

經幢在亳州城內大寺佛殿之西其東亦有一幢與此對

植無年月可見記首題開元寺新修佛項尊勝陀羅尼經

幢州志載寺舊名崇因宋改咸平據此記宋初猶名開元

則志失於推考矣文為鄉貢進士黃麟撰其序粵有信士

王懷早悟真空志歸元寂聲搜筐篋共圖功德遠市他山

口刻斯典又言皇帝口星御極懷斗當陽銅刁罷振連營

鐵馬休征遠塞

云

時乾德元年歲次癸亥三月十八日

甲午建會首王瓌書宋史太祖紀建隆四年十一月甲子

有事南郊大赦改元乾德此幢建于三月已稱乾德蓋立石時追書之僅下匡字既缺畫而元不為始祖諱于時立國之初制猶未嚴也顧亭林以宋避太宗御名義士皆改為信士今此題稱信士王瓌必非豫為之避義士信士兩名並可通謂之

西陽明洞記

正書乾德五年七月在濬縣

記稱大坏山側有龍窟焉窟之北有石壁每至日昃山半夕陽照明勃勃逼口口皎如洞戶遂易名曰西陽明洞又稱巖壁之由自隨唐已來每有事於水旱嘗下詔宰臣羣官將命祠禱爵里備書如記所志隨唐蓋舊有名題矣又題換記人庄宅副使霍錢奉宣監護至此宋史職官志皇

城以下諸司使內有庄宅使唐時領此使職率用奄人為

之今此題霍錢其亦內侍品官與自署大宋乾德元年甲

子歲建隆四年十一月改元是乾德元年為癸亥又題乾德五年歲次丁卯甲

子既為改元之歲五年決非丁卯臨文者誤紀歲名而前

後不知對勘皆闡流不學之過也

修唐太宗廟碑銘

行書開寶六年十月

碑銘前列朝散大夫行殿中侍御大夫判度支公事柱國

李瑩奉勅撰翰林待詔中散大夫行太僕寺丞孫崇望奉

勅書李瑩見宋史太祖本紀開寶七年五月殿中侍御史

李瑩坐受南唐饋遺責受左贊善大夫亦見李濱傳云瑩

字正白善詞賦廣順進士蒲帥張鐸辟為記室因家河中

乾德初右補闕蘇德祥薦為殿中侍御史度支判官使江南坐受李從諫賂遺責授右贊善大夫與碑題銜合崇望見禮志太祖命詞臣分詣諸廟書於石是太宗廟碑即歷代帝待詔孫崇望等分詣諸廟書於石是太宗廟碑即歷代帝王碑中之一也碑又載啓舊墓所以極衣冠之飾本紀開寶三年詔西京帝王諸陵寢嘗被發掘者有司備法服常服各一襲具棺槨重葬約紀與碑相符揮塵前錄帝王陵重制禮衣常服棺槨重葬焉而碑載旋聞列籓咸訖不續揚此能事屬干盛朝証之紀文開寶四年夏四月辛卯南唐遣其弟從諫來朝貢發廂軍千人修前代陵寢之在秦者故碑以列藩揚此能事信得其審

重修鑄龍興寺大悲閣像碑

行書端拱二年正月在真定府城

碑前結銜朝奉郎尚書兵部員外郎知制誥柱國賜緋魚袋田錫奉勅撰翰林待詔將士郎口少府監主簿御書院祇候吳郢奉勅書郢見張洎傳翰林待詔尹熙古吳郢皆江東人田錫宋史有傳去轉起居舍人還判登聞鼓院上書請封禪以本官知制誥尋加兵部員外郎與碑題合錫好讀書屬文然文不多見于世予故約此碑之詞云周顯德中世宗納近臣之議詔天下毀銅像鼓鑄以資帑財惟鎮之邦大像亦滅中有字曰遇顯即毀乾德中乃命重鑄凡四十二臂七十三尺又構以摩雲之閣越太平興國七年僧名瓊法祇受宣召專主是閣案五代史周世宗本紀

顯德二年夏五月甲戌大毀佛寺禁民親無侍養而爲僧尼及私自度者又史贊云世宗卽位之明年廢天下佛寺三千三百三十六是時中國乏錢乃詔悉毀天下銅佛像以鑄錢卽此文所記也而王定國隨手雜錄柴世宗銷天下銅像以爲錢真定像高大不可施工有司請免旣而北伐命以炮擊之中佛乳竟不能毀未幾世宗癰發乳間而殂此殆好事者欲誑耀佛氏之靈妄爲是說今以碑証之明云大像亦滅至乾德中乃重鑄蓋定國亦踵其謬不知詳驗也

重修北嶽安天王廟碑銘

行書淳化二年八月在曲陽

碑銘稱法天崇道皇帝宋史真宗紀端拱二年十二月辛

酉上法天崇道文武皇帝詔去文武二字餘許之此碑所題與史合前列承奉郎守左司諫知制誥柱國賜紫金魚袋王禹偁奉勅撰本傳拜禹偁左司諫知制誥而階承奉郎勳爲柱國未書也翰林待詔將仕郎守少府監主簿御書院祇候賜緋魚袋黃仲英奉勅書翰林書直將仕郎守高州樂原縣主簿御書院祇候葛湍奉勅題額湍見呂文仲傳寓直御書院與侍書王著更宿時書學葛湍亦直禁中太宗暇日每從容問文仲以書史著以筆法湍以字學又見進說文解字序稱翰林書學臣葛湍又見李燾說文解字五音韻譜本朝雍熙三年錯兄鉉初承詔與句中正葛湍王惟恭等詳校說文是也後列銜正書字獨小有云

忠果雄勇宣力功臣定武軍節度定州管內觀察處置北平軍等使金紫光祿大夫檢校太保使持節定州諸軍事定州刺史兼御史大夫柱國兼駐泊馬步軍都部署清河郡開國公食邑四千二百戶食實封六百戶張訓職官志賜號有忠亮忠勇無忠果雄勇攷却掃編中書樞密賜推忠協謀同德佐理餘官則推誠保德奉義翊戴掌兵則忠果雄勇宣力外臣則純誠順化張訓卽因掌兵賜號而志未之及非此則茂由識遺典矣

青山廟新修三門記

行書至道元年

修三門記鄉貢進士呂應撰學究薛揆書云皇帝以當郡盤基輔於王室決天波之大派分禁樹之高枝蓋指德恭

判濟州是以云定安公之主郡也銘詞又云潁水先生卽記稱維那頭陳朗諸人潁川陳氏郡望也後列銜文林郎守鉅野縣主簿趙嵩將仕郎守大理評事知鉅野縣事朱澤殿直兵馬監押兼在城巡檢齊汴承奉郎守秘書著作佐郎通判濟州軍州事借緝穆說皇姪金紫光祿大夫檢校太保左驍衛大將軍判濟州軍州事兼御史大夫上柱國定安公食邑一千八百戶趙德恭宋史太宗紀雍熙二年春正月丙辰以德恭爲左武衛大將軍判濟州封定安侯右補闕劉蒙叟通判濟州秦王廷美傳載德恭受封在雍熙元年十二月又以爲封安定郡侯與紀頗不同未知孰得其實至端拱元年進封安定郡公淳化四年改左驍

衛大將軍與此結銜符其勲階食邑史固從略不書也若安定之書為定

安碑與紀合似宜依石刻為正

德恭初判濟州劉蒙叟為

通判至此已受替故至道改元惟穆說蒞任矣又鐫當州

施主前元從押衙陳安唐有元從禁軍元從功臣等號以

此証之太祖陳橋初起亦賜元從之號司馬光傳光曰國

初草創天步尚艱故御極之初必以左右舊人為腹心耳

目謂之隨龍碑所題元從者正謂是也又哲宗紀紹聖元

年閏四月丁亥詔神宗隨龍人趙世長等遷秩賜賚有差

並可舉証

刻說文偏旁字原

篆書咸平二年六月

說文目錄偏旁為南岳師雲安宣義大師賜師夢英書

附刻英自序其文過自矜詡以為惟汾陽郭忠恕其全繼

李監之美宋史列傳忠恕河南洛陽人此云汾陽當舉其

祖望也又附忠恕答書云見寄偏旁五百三十九字按說

文字原唯有五百四十部子字合收在子部今日錄妄有

更改之又集解中誤去部在注中今點檢偏旁少晶心至

龜弦五字故知林氏虛誕誤於後進是則宋初之本訛脫

見摘於郭氏如此攷林氏謂林罕也江少虞皇朝事實類

苑與宋景文筆記並載錯為說文繫傳恕先作汗簡佩觿

時蜀有林氏作小說然狹於徐郭者當即其人後又題推

忠宣力翊戴功臣建武軍節度觀察留後知永興軍府事

兼都提轄永興軍華耀乾商兵甲捉賊公事光祿大夫檢

校太傅上柱國彭城郡開國公食邑四千五百戶食實封七百戶劉知信推誠宣力翊戴功臣鎮寧軍節度瀘州管內觀察處置河堤等使金紫光祿大夫檢校太傅使持節瀘州諸軍事行瀘州刺史兼御史大夫知涇州軍州事兼管界都巡檢使上柱國平陽郡開國公食邑四千二百戶食實封一千戶柴禹錫史本傳禹錫至道初制受鎮寧軍節度知涇州與此合知信咸平初拜建武軍節度觀察留後知永平軍府永平卽永興字轉訛也

高紳等題名

右題名正書文云右司諫直史館知華州高紳尚書戶部員外郎直史館曾致堯陝西轉運副使太常博士李易咸

平四年閏十二月十五日記宋史列傳張齊賢爲涇原

寧環慶等州經略使選致堯爲判官

却掃編國朝咸平中張文定公齊賢奏請

戶部員外郎直史館曾致堯爲判官

仍遷戶部員外郎其直史館猶帶於此

也又東都事略載致堯爲尚書戶部員外郎直史館與題

名合元豐類稿先大夫集後序云始公尤見奇于太宗自

光祿寺丞越州監酒稅召見以爲直史館遂爲兩浙轉運

使未久而真宗卽位益以材見知初試以知制誥及西兵

起又以爲自陝以西經略判官然則致堯當咸平時已知

制誥而題名結銜猶用其直史館當以其初試未真爲之

也易見河渠志開寶八年知瓊州李易上言州南五里有

度靈塘開修渠堰溉水田三百餘頃居民賴之卽其人

修文宣王廟記 八分書咸平口年八月在臨潼縣

碑記將仕郎守京兆府臨潼縣主簿王漢撰鄉貢進士蕭資書并題額文多漫漶中有云咸平紀號之元年詔以太子中令趙公蒞是邑明年春拜孔子廟返則召邑中進士明經之好事者又募邑中人之有識者鳩材撤舊而新之其略如此後列銜名多磨滅錄其顯存者口仕郎守殿中丞通判軍府事騎都尉借緋劉克勤正奉大夫尚書兵部侍郎知軍府事上柱國賜紫金魚袋天水縣開國伯食邑九百戶趙昌言宋史本傳昌言真宗即位遷兵部侍郎知陝州表求還京不許未幾移知永興軍此題知軍府事即永興軍府以當任在本路故結銜不更書永興也昌言爵

為開國伯史失書

錢惟演北岳題名

右題名八分書自左起文云景德二年夏京師霖潦詔太僕少卿直秘閣錢惟演止雨于安天王祠時七月六日侍禁劉承澤同行宋史列傳惟演召試學士院以笏起草立就真宗稱善改太僕少卿獻咸平聖政錄命直秘閣與題名合惟景德二年夏京師霖潦致勞遣使致禱而淫雨之災真宗本紀及五行志並佚脫不書豈以在都下史筆有所諱言之與惟演奉使傳亦未載皆失紀也

賀遵式北嶽題名

右題名正書文云維大宋景德二年歲次乙巳十一月乙

已朔三十日甲戌內殿崇班鎮定邢趙等州沿山東山西都巡檢使銀青光祿大夫檢校左散騎尚侍兼御史大夫騎都尉清水縣開國子食邑五百戶賀遵式部領軍馬巡檢至此遂齋心詣廟口獻香紙以表虔誠也宋史職官志巡檢司或數州數縣管界此題鎮定邢趙數州之制也又掌訓治甲兵巡邏州邑此題部領軍馬巡檢至此與史符合常侍作尚侍尚有常音因以音字爲正字上石者不能無謬誤矣遵式爲內殿崇班初授檢校當爲國子祭酒兼御史大夫今作左散騎常侍蓋遇恩例累加也

李允正北岳題名

右題名正書文云客省使誠州刺史鎮定等州兵馬都鈐

韓知定州軍州事兼管內制置營田勸農等使李允正景德三年丙午十月己亥八日丁丑奉詔致祭宣德郎太常博士通判軍州兼制置營田事輕車都尉借緋王利內殿崇班閣門祇候兵馬都監魏化基預三獻之禮陪位三班借職隨行指使張儀候口將仕郎守曲陽縣令董日靖按允正宋史有傳云字修已與錢若水同詣洪德懷安沿邊諸若經度邊事加領誠州刺史改客省使知定州兼鎮定都鈐轄與題名結銜合

龐奎題名

右題名行書文云景德三年冬口天王降靈寶三錄壇口式于四嶽勅屬郡口更營築于廟殿之前自十月孟旬承

郡匠旋至十一月五日畢因刊闕石以紀歲事之口將仕
郎試芸口吏守主簿龐奎題靈寶三錄于史無所攷然崇
信之篤命官為營築亦其崇飾天書之意兆諸此矣試芸
下當作閣字以秘書省有秘閣得置吏也陳述古題名內
載芸校即謂秘書省校書郎與此正同

永興軍修元聖文宣王廟大門記

行書大中祥符二年六月在西安府學

碑前列朝奉郎尚書比部員外郎知制誥知軍府兼口內
勸農使上輕軍都尉賜紫金魚袋孫僅撰朝奉郎尚書屯
田員外郎通判軍府兼管內勸農渠河事上騎都尉賜緋
魚袋冉宗閔書僅宋史有傳景德初北邊請盟遣使交聘
僅首為國母生辰使遷右正言知制誥賜金紫是年冬永

興孫全照求代真宗思擇循良任之御書邊肅洎僅二名
示宰相或言僅嘗倅京府諸民政乃命知永興軍府結銜
並與史同但碑稱丁未歲冬奉命出守丁未為景德四年
而傳即書是年冬于景德初之後攷真宗紀遣太子中允
孫僅使契丹實景德二年二月及後又遷官必非在此一
年出守永興以碑作四年証之疑史文稱是年是即四字
之訛僅兼管內勸農使宗閔兼管內勸農事入銜宋朝事
實景德二年從丁謂所請少卿監刺史閤門使以上知州
者並兼管內勸農使餘及同判並兼勸農事是也碑之立
在大中祥符二年六月禮志云是年五月乙卯詔追封十
哲為公七十二弟子為侯先儒為伯

云既以國諱改諡

至聖文宣王此碑猶稱元聖改謚之詔時尙未及永興與建廣武原宣聖家廟碑記

正書大中祥符二年十月在河陰縣

碑載祥符元年駕幸曲阜釋奠廟林賜孔氏男女錢帛有差四十五世孫孔延世襲封文宣公宋史真宗紀至道三年未改元九月戊寅以孔子四十五世孫延世襲封文宣公孔宜傳延世字茂先以父死事賜學究出身爲曲阜主簿歷闕長葛二令真宗至道三年十一月召赴闕以爲曲阜令襲封文宣公碑又云奏孔氏有隨駕參軍孔晃一枝在河南廣武原上召問晃具陳臣祖孔幾仕唐禮部尙書國公孔繹曾荷先朝御塋廣武原子孫守墳不能東歸上喜更命留守王羽騰來原建修家廟始于祥符二年仲春

落子孟冬之月真宗紀大中祥符元年十一月戊午幸曲阜縣謁文宣王廟遂幸孔林禮志詔以十一月一日幸曲阜備禮謁文宣王廟內外設黃麾仗孔氏宗屬並陪位復幸孔林以樹擁道降輿乘馬至文宣墓設奠再拜碑稱釋奠廟林與史合但以其先臣幾與緯仕唐蒙御塋新舊唐史俱不載又韓文公孔幾墓誌銘亦言公子塋公于河南河陰縣廣武原先公僕射墓之右亦無所稱御塋者或其家乘炫飾之詞不足信也又孔晃一支經延世具陳在河南廣武原始未存著石刻昭信如是今闕里文獻攷于宗支流寓不附其名殆失搜錄碑後列贊詞題爲御贊禮志親製刻石廟中當卽是文

周瑩北岳題名

右題名正書文云推誠保節宣力翊戴功臣天平軍節度
鄆州管內觀察處置等使金紫光祿大夫檢校太傅使持
節鄆州諸軍使鄆州刺史口鎮定路駐泊馬步軍都部署
兼知定州軍州管內制置營田勸農使兼御史大夫上柱
國汝陽郡開國公食邑七千一百戶食實封二千六百戶
周瑩大中祥符三年九月二十三日後又有結銜與此題
同惟六百戶作八百又書氏而不名差異耳宋史列傳周
瑩大中祥符初改太平軍節度明年爲鎮定都部署兼知
定州與此題合而賜號及官階勲爵悉畧而不書又改大
平軍節度以題名攷之當爲天平軍也天平軍節度本鄆

州題稱鄆州刺史爲得其實職官志功臣賜號有宣德無
宣力今按之此題宣力翊戴知史有誤焉已

汧陽縣普濟禪院碑銘

大中祥符三年十一月

碑銘首題宣德郎尙書都官員外郎知隴州軍州兼管內

勸農事上騎都尉賜緋魚帶借紫閣仲卿撰京兆府廣慈

禪院文學沙門善雋習晉右將軍王羲之書文序普濟禪

院自唐武德中創建歷開平同光各有興葺洎開寶元年

賜紫僧進誦重疊興替益爲增治于太平興國三年降勅

改爲普濟禪院事跡始末尙可概見後列諸官名氏其稱

內品宣德郎守內侍省內寺伯武騎尉監酒稅梁延意攷

宋史職官志內侍省無內寺伯之名惟唐志有之疑宦豎

不通古今謬以唐制假號爾善雋自署習王羲之書與濟源延慶禪院舍利塔記揚虛已所題同當由一時習尙爲之不足異也

龍門銘 正書

龍門銘真宗御製御書并篆額少有斷剝已失御製二字前爲序有云躬薦兩圭祀汾陰而祈民福言旋六轡臨雒宅而觀土風後乃書銘最後題大中祥符四年三月十日玉海祥符四年祀汾陰回三月癸未幸西京龍門山諸寺作遊龍門詩又作龍門銘卽此是也宋史真宗紀是年三月己卯次西京至甲午發西京中間駐驛凡十六日登覽臨幸固宜有是銘然紀于二月祀后土書作汾陰配饗銘

河濱四海贊今此銘不書紀蓋從略之

元聖文宣王贊加號詔

正書大中祥符五年八月在孟縣

元聖文宣王贊宋真宗御製先爲序後乃書贊僅缺數字序云檢玉介邱迴輿闕里宋史禮志大中祥符元年封泰山詔以十一月一日幸曲阜卽指其事加號詔文已殘缺不可屬讀後另行書詔先聖加號元聖文宣王 缺部尙書口齊賢等以太牢致祭字存齊賢卽張齊賢本傳景德初起爲兵部尙書二年改吏部尙書從東封還復拜右僕射以記按之齊賢被命致祭卽在東封時矣志載親製贊刻

石廟中謂此贊也

案元年已親製贊刻石廟中二年又親製元聖文宣王贊元聖卽此詔所云加

號也而志不言刻石又此碑立在五年尙從元聖之諡不以至聖爲詞

當時惟見于曲阜文

宣王廟及按此石後記五年八月二十三日奉勅道州府
軍監各於下則諸處皆得立石而史文為失紀也石在孟
縣學署前余癸丑冬十一月重過此復就碑諦視為手撫
者久之

楊永貴北嶽題名

右題名正書文云大中祥符五年十月二十四日聖祖九
天司命天尊大帝降延恩殿宣差入內內侍內侍高品楊
永貴於安天元聖帝廟并真君觀請道士二七人僧二七
人起建道場各三晝夜於閏十月十七日開啓至二十三
日罷散故記之真宗紀五年冬十月戊午延恩殿道場帝
瞻九天司命天尊降宋朝事實聖祖以大中祥符五年十

月戊午降于禁中延恩殿云閏十月癸巳恭上九天司
命保生天尊號曰聖祖上靈高道九天司命保生天尊大
帝較史文為詳証之此題則于司命下多保生字案閏十
月乙丑朔癸巳乃二十九日永貴以此月十七日開啓至
二十三日罷散上號之詔猶未聞故于保生二字題名時
不備

康廷讓北嶽題名

右題名行書文云大宋大中祥符六年二月十九日奉勅
移塑安天元聖帝尊像先於真君觀請道士二七人起建
道場七晝夜罷散至二十二日夜質明用三獻官并祭禮
祭告安天元聖帝訖至二十五日卯後四刻用乙時移安

天元聖帝于後殿與靖明后相並安置訖當日亥時請道士二七人起建安神道場七晝夜罷散日各設醮一座謹具三獻官并陪位官如後初獻官入內內侍省內侍殿頭勾當北岳移塑康廷讓亞獻官東頭供奉官知曲陽縣兼兵馬監押褚省恕終獻官定武軍節度推官承奉郎試大理評事苗用之陪位官三班差使殿侍權鎮定等州沿西山同巡檢張恩將仕郎守曲陽縣主簿陳化新將仕郎守曲陽縣尉竇化昌翰林圖畫院學生郎坦龐德震管押衣冕定州部署司指使三班奉職韓裔定武軍都知兵馬使都大部領一行移塑李士元移塑司定州使院勾押官董昇前行牛旻魏澄王恩後行李德教鍊使勾當設務趙翰

衙前軍將王聿耿澄案宋史真宗本紀及禮志皆未載移塑與靖明后並置之文或以其事微不與加號奉册比也職官志翰林院勾當官一員以內侍押班都知充總天文書藝圖畫醫官四局凡執技以事上者皆在焉然則此稱翰林圖畫院當與志合而學生名或卽當時執技者也若志言翰林醫官有學生常以春秋合格者取三百人據是則圖畫亦宜有學生矣

呂言同北嶽題名

右題名正書文去大中祥符六年五月七日勅以玉清昭應宮聖像到京命尙書都官員外郎呂言同殿中丞通判定州軍州事王臻祭告北嶽安天元聖帝是月二十三日

行禮畢同行禮東頭供奉官知曲陽縣事兼兵馬監押褚
省恕讀祝文將仕郎守曲陽縣主簿陳化新真宗紀六年
三月乙卯建安軍鑄玉皇聖祖太祖太宗尊像成以丁謂
爲迎奉使五月甲辰聖像至今題名所記聖像到京是其
事也紀又言乙卯謁聖像奉安于玉清宮丁巳遣使奉告
諸陵然則當時張皇其事既已告諸陵寢矣而方嶽之告
竟不著焉失於詳紀矣

空桑廟碑贊

篆書大中祥符七年正月

碑在杞縣中刊斷文句頗不屬首行題宋真宗幸空桑觀
鴈御製碑下缺後題大中祥符七年春正月二十九日
口闕奉勅撰勒刻石宋史真宗紀是年春正月壬寅車駕

奉天書發京師蓋因六年八月有詔來春親謁亳州太清
宮至此途次所經得以臨幸空桑廟也碑云朕因駐口口
用懷賢聊復刻銘庶幾旌善與紀可相證惜史以其事微
不書也

真宗御製先天太后贊

正書大中祥符七年在鹿邑

先天太后贊前有序略云大明聖善之德別建密清之庭
奉先天之各所以崇徽傳葺洞霄之宮所以法元都云云

玉海祥符七年七月御製朝謁太清宮頌西京頌明道宮
碑聖祖殿等銘贊卽此碑是也宋史真宗紀大中祥符七
年正月己酉朝謁太清宮是夜月重輪幸先天觀廣靈洞
霄宮碑所云先天洞霄者當指其迹水經注澗水內李母

家家東有碑是永興元年譙令長沙王阜所立碑云老子
生於曲澗新唐書地理志真源縣有洞霄宮先天太后祠蓋李母靈魄託此已
久宜為後世崇飾所起也紀於六年七月書亳州官吏老父

三千三百人詣闕請謁太清宮今碑序眷惟景毫之耆舊
口象魏之縉紳述款謁之令儀舉省方之舊典與紀文相
符碑質過大摸拓殊不易余及門何栗亭自其外姻家轉

假一紙俾余跋之

嚴國禎題名

右題名正書文云皇宋甲寅歲尚書都官員外郎嚴國禎
奉命祭告上玉皇大天帝聖號及含譽星見東頭供奉官
知曲陽縣事兼兵馬監押諸省恕將仕郎守曲陽縣主簿

陳化新同預獻官將仕郎守曲陽縣尉竇化昌讀文定州
指使桑美陪位時大中祥符七年十月八日記宋史真宗
本紀大中祥符七年九月丙戌含譽星再見辛卯尊上玉
皇聖號曰太上開天執符御歷含真體道玉皇大天帝証
之今題名所記蓋當時遣使祭告方嶽為失紀矣禮志於
七年九月下書詔以來年正月上玉帝聖號今此題書上
聖號即在七年與紀合或當時先立號告方嶽至八年乃
真宗親上故志與紀有異

高繼勳北嶽題名

右題名正書文云甲寅直歲國家以立冬致祭詔郡縣長
吏躬行祀事因得率僚佐充三獻官伏謁于祠下初獻官

西上閣門副使榮州刺史知定州軍州事兼管內營田制
 置勸農使充鎮定等路駐泊兵馬鈐轄高繼勳亞獻官太
 常博士通判定州軍州兼制置營田管內勸農事騎都尉
 王闢終獻官贊善大夫監定州商稅務上騎都尉崔應機
 守縣尉牛口口守主簿夏候裔左侍禁知縣事何仁儼後
 又有高繼勳題名書銜同此但不著年月又不列三獻官
 名按甲寅直歲大中祥符七年也書甲子而不書年號當
 以碑陰上題名甲寅已紀號爾繼勳附父高瓊傳載奉使
 契丹還知定州遷西上閣門使昭州團練使徙鄜延路鈐
 轄坐市馬虧價失官已而復為西上閣門使榮州刺史知興
 州領果州團練使徙貝州復知瀛州據此題為榮州刺史
 後又復知定州傳竟失錄為西上閣門副使而傳稱閣門
 使皆史之失也

陳堯佐請平治太行山道劄子

大中祥符八年十二月

劄子石刻陳堯佐為河東轉運使愚太行山險公私綱運
 人畜費力乞降勅命下懷澤兩州每於四處巡察一度舉
 行差官相度如有雨水衝泛妨滯車牛之處即計工量差
 上口塘馬勒員催部押修填開築平作了畢即畫時押送
 為使并不差擾修增況本處嘗有山路巡檢使臣便令提
 轄點校甚不費力頗利公私以史証之堯佐自徙京西轉
 運使又徙河東路劄子即上於此時然傳載堯佐奏除石
 炭稅及減澤州大廣冶鉄課數十萬而鑿治隘道區畫之

善反不特書此於堯佐幹略沒其實矣歐陽集文惠陳公
神道碑銘載其在河東鑿澤州路後徙河北鑿懷州路而
大行之險通行者德公以為利即此劄子所上是也山路
巡檢使職官志亦失載

北嶽安天元聖帝碑銘行書大中祥符九年四月在曲陽

碑首序真宗詔北嶽安天王可增號安天元聖帝上被華
袞秉鎮圭步自青蒲臨於黻座出板詔命輶軒以尙書工
部侍郎馮起攝太尉太僕少卿攝司徒裴庄奉玉册袞冕
於曲陽之祠又云恭册將陞於文陛即為之興瑞節已出
於端闈然後乃罷宋史禮志稱帝改服袞冕御乾元殿中
書侍郎引五嶽玉册尚衣奉袞冕升殿上為之興玉册發

至于朝元門外帝乃坐今以碑按之所紀當時儀注與史
並符馮起裴庄二人奉册蓋一為使一為副庄本傳云為
北嶽加號册禮副使是也而真宗紀但書向敏中等為五
嶽奉册使餘人不悉記文從畧耳又陳彭年奉勅所撰結
銜翰林學士太中大夫行給事中知制誥兼龍圖閣學士
秘書監同修國史集賢殿修撰知禮儀院上柱國招信縣
開國子食邑六百戶賜紫金魚袋與本傳符惟太中大夫
知制誥及爵為開國子失載後結銜正書字微小東染院
使銀青光祿大夫檢校工部尙書知定州軍州兼制置營
田管內勸農事充鎮定等路駐泊兵馬鈐轄兼御史大夫
騎都尉彭城郡開國侯食邑一千五百戶劉承宗史本傳

載拜東染院使知定州又兼鎮定路兵馬鈐轄而階勳爵
及檢校兼官悉未之及也

王懷珪題名

右題名正書自左起文云大中祥符九年六月十二日入
內內侍省內侍高品王懷珪奉宣于嶽廟真君觀道場七
晝夜罷散日設醮一座續勅差太府少卿蔡汝賁缺祝版
祭告同會於祠天理寺丞知縣事張綽書長安普濟廣教
大師澄遠宋史職官志有內侍省入內內侍省而入內內
侍省尤爲親近故懷珪奉宣嶽廟自爲題名加于朝臣之
上足以知其恣而橫也懷珪附宦者王繼恩傳子懷珪轉
入內高班

王能北嶽題名

右題名正書文云侍衛親軍馬軍副都指揮指揮使振武
軍節度勝州管內觀察處置等使金紫光祿大夫檢校太
傅使持節勝州諸軍事勝州刺史鎮定等路駐泊馬步軍
都部署知定州軍州管內制置營田勸農使兼御史大夫
上柱國瑯琊郡開國公食邑二千七百戶食實封四百戶
臣王能亞獻官朝奉郎守殿中丞通判定州軍州兼管內
營田勸農事借緋臣王臻終獻官觀察支使宣德郎試大
理評事兼監察御史臣林茂先後複題王能官銜無年月
宋史列傳王能大中祥符二年詔合鎮定兩路部署爲一
命能領之明年召入拜侍衛步軍副都指揮使領曹州觀

察使祀汾陰留為京城巡檢兼留司殿前司事禮成加領
振武軍節度復為鎮定副都部署兼知定州此題既題振武
軍節度則在祀汾陰禮成後復為鎮定時也然傳唯稱副
都部署題名稱都部署或初為副而漸轉為都史不及收
也又傳稱步軍副都指揮使題名作馬軍當依題名為正王
臻傳舉進士中第為大理評事歷知舒城會昌縣通判徐
定二州今題名稱通判定州是也不載初獻官與曹璨題
名同亞獻終獻稱臣某又與曹璨異

授堂金石文字續跋卷八終

受業大興張師德校

授堂金石文字續跋卷九

偃師武億虛谷著

男穆淳編

孫未重校刊

宋章安世北岳題名

右題名正書文云大宋天禧元年歲次丁巳正月一日辛
丑皇帝詣玉清昭應宮恭上玉皇寶冊袞服及詣景靈宮
上聖祖寶冊仙衣至十一日辛亥朝饗太廟南郊恭謝禮
畢奉聖旨差朝奉郎行太常博士章安世祭告北嶽聖祠
終獻官定州觀察支使宣德郎試大理評事兼監察御史
茂先亞獻官左班殿直知曲陽縣事兼兵馬監押沿邊山
口寨鋪巡檢張禹吉初獻官朝奉郎行太常博士輕車都
尉章安世宋史真宗紀天禧元年春正月辛丑朔改元詣

玉清昭應宮薦獻上玉皇大天帝寶冊袞服壬寅上聖祖
寶冊已酉上太廟謚冊庚戌享六室辛亥謝天地于南郊
與此題合夢溪筆談上親郊廟冊文皆曰恭薦歲事先景
靈宮謂之朝獻次太廟謂之朝饗未乃有事于南郊今所序
亦先景靈宮未乃及太廟南郊蓋掌故所存有由然也
內侍殿頭鄧保口題名

右題名行書首尾不完其文云京官勾部送御製書奉神
述碑石壹疋赴西嶽廟殿上西畔於天禧四年口月二十
七日已後午前丙時豎立訖故記之入內內侍省內侍殿
頭鄧保口宋史禮志加上五嶽帝號帝自作奉神述備紀
崇奉意碑撰冊文真宗紀大中祥符四年五月乙未上五

嶽帝號作奉神述玉海祥符四年七月丁亥資政殿大學
士向敏中等請以聖制奉神述刻石遂親書刻石於奉神
觀九年三月庚申丁謂請刻石於會靈觀從之與此題合
至建堅碑石已越九年則史未具錄也鄧保下缺字疑當
爲吉字范鎮傳副都知任守忠鄧保吉同日除者當是其
人也

摩騰入漢靈異記

行書天禧五年正月

記爲西蜀武都山僧景遵書在今洛陽白馬寺不見撰人
名氏蓋唐長興三年二月所記宋時爲重建之者約其文
云已巳之歲四月八日孝明皇帝駕幸鴻臚卿寺詔問迦
葉摩騰述聖塚所由帝遂爲造浮圖至後周二年四月八

日塔上現異云石林燕語漢以來九卿官府皆名曰寺鴻臚其一也本以待四裔賓客明帝時攝摩騰竺法蘭自西域以白馬負經至舍於鴻臚寺既死屍不壞留寺中後遂以為浮圖之居即雒中白馬寺也然則摩騰固嘗寄魄于此宜其幻迹多矣鴻臚書作廬湧起書作勇上石者誤

段微明題名

右題名正書自左向右文云乾興元年二月十五日奉宣差入內侍省內侍高品段微明往慶成軍太寧宮太寧廟各開啓道場七晝夜罷散日缺趨西嶽廟并真君觀各開啓道場缺夜各設清醮一座宋史禮志祈報諸祭云或啓建道場於諸寺觀或遣內臣分詣州郡如河中之后土

廟太寧宮亳之太清明道宮兗之會真景靈宮太極觀鳳翔之太平宮舒州之靈仙觀江州之太平觀泗州之延祥觀皆函香奉祝驛往禱之題名段微明奉差往慶成軍即遣內臣分詣也微明所祈未著其實以真宗本紀案之乾興元年二月甲寅對宰相于便殿帝不豫增劇禱于山川神祇是月庚子朔甲寅為月之十五日微明此行當為真宗祈佑與

留題安天元聖帝廟詩并序

詩序正書朝奉郎守太子中舍同判成德軍府兼管內勸農事騎都尉賜緋魚袋趙惟吉上序云北岳安天元聖帝廟巨宋端拱二年中先父察院奉太宗皇帝睿旨與張殿

頭監重修而厥功告成至淳化二載賜碑以旌其事王內翰之文黃御書之字惟吉于天聖元祀仲秋月奉轉運使差提入便軍儲由中山之曲陽詣是廟仰朝拜之禮閱是碑興感慕之懷輒啟鐫巴什于碑陰詩未具錄案同判成德軍不云通判攷齊東野語本朝章獻太后父諱通嘗改通直郎爲同直郎通州爲崇州通判爲同判通進司爲承進司通奉爲中奉通事舍人爲宣事舍人至明道間遂復舊此題當天聖元祀故宜以同判相避易與宋史仁宗紀初卽位詔中外避皇太后父諱正合

賜賀蘭栖真勅并贈詩序碑

楊虛已行書天聖九年十月在濟源

碑上方列真宗勅書及二韻詩宋史賀蘭栖真傳亦載勅

書以此參校傳凡稱師碑皆作汝脫屣浮雲之外碑作浮榮爰命使車碑作使臣往申禮聘碑作以禮徵聘來儀闕廷碑作來至必副招延無憚登涉碑作無辭跋涉之勞當體招延之意又今遣入內內品李懷贊召師赴闕碑于入內下多高班字李懷贊多往彼字案懷贊見李神福傳子懷贊卽其中方列七言四韻詩一首贈宗真大師下題尙書右僕射判軍州事張齊賢上又七言詩一絕贈賀蘭宗真大師下題知制誥陳堯咨上傳載栖真號宗元大師碑作宗真由避國諱也然真宗賜詩稱玄元留教五千言豈至尊固可以臨文不諱耶下方載進士汪仲詢所撰序其文云賀蘭栖真者譙國人也始事驪山白鹿觀馮洞元

口仲寂復訪道於終南結茅於巖曲後更思得福地以毓
其真於是乎游王屋口濟源濟之奉仙卽唐小魯真人舊
隱之所今本傳不悉其里居所在但云不知何許人及栖
真生平寄隱並在陝西傳惟書始居嵩山紫虛觀而已碑
載二年秋九月遣中侍馳蒲輪賫鸞板而召之入對崇和
果加前席未幾請還後于錫符紀號之三祀冬十一月二
十有一日無疾而終享年一百一十三歲傳唯稱爲道士
自言百歲皆不如碑之詳也碑又載卒後魄體柔軟與傳
稱卒時大雪經三日頂猶熱文亦小異

張旻留題詩石刻

天聖三年十月張得一書

張旻改名者宋史有傳今按此題首序云余自天禧元祀

解宥密之職首治是邦越期月而移蒞他郡于今八載復
領蕃政再踐殊館仰廟貌之如昔感威靈而長在強抽鄙
思以紀歲華後列五言詩一章並行書其餘則正書旻本
傳進宣徽南院使罷判河陽所謂首治是邦也傳又云丁
父母憂起復徙武寧軍節度使卽此移蒞他郡也序又稱
復領藩政宰輔表天聖三年十二月乙丑張旻自淮南節
度使檢校太師同平章事依前官遷樞密使下又有歷河
陽之文悉與石刻合然旻題銜淮南節度使特進檢校太
師同中書門下平章事判軍州事蓋當三年十月七日已
立石矣則被命更前於十月而表反書於是年十二月乙
丑所未悉也後列旻諸子從一禮一得一如一昭一銜名

傳稱旻有子二十四人得一可一利一希一誠一今得此
題又附見其四矣得一題東頭供奉官閣門祇候傳言得
一慶歷中守貝州妖人王則作亂不能死又與之草禮儀
伏誅是也旻御諸子嚴肅有法日一見之卽出就外舍而
得一可一尙不免刑誅況淫酗以率其子者能幸脫與

西京龍門山大像龕題名

右題名正書自左起文云三班借職監伊河竹木務兼本
鎮煙火修整石佛像石道公事口口弟祐同至并仲子觀
東鄉友口吏顏翰安定胡洸同至此大宋天聖四年丙寅
三月二十九日口書鐫手李口竹木務于職官志屬將作
監至西京設此官程伯淳傳求監洛河竹木務司馬光傳

光居洛河南尹轉運使敬事蔡天申獨爲設一班光顧吏
引天申立監竹木務官富贊善之下据此題則伊河已設
務矣又云兼本鎮煙火職官志鎮砦官諸鎮置于管下人
煙繁盛處設監官管火禁文獻通考建隆三年置鎮將只
許勾當鎮下煙火爭競公事宋二陵採石碑後題亦有朝
奉郎監西京偃師緱氏鎮管勾城內煙火事兼稅場驍騎
尉賜緋魚袋孫龐名蓋每鎮皆設此員史不及悉錄也至
南渡後逐路置兵馬都監兵馬監押掌烟火公事捉捕盜
賊蓋沿于此本鎮卽龍門元豐九域志建春門彭婆洛陽
龍門上東門五鎮此其一也

濟源令陳公善政錄

正書天聖九年
四月在濟源

碑首列將仕郎試秘書省校書郎前安利軍判官張庚撰
 進士楊虛已書安利軍即地里志通利軍天聖元年改碑
 云穎川陳公謂省華也省華見堯佐傳事孟祖為西水尉
 蜀平授隴城主簿累遷櫟陽令徙樓煩令此碑稱孟蜀納
 籍載調得此縣是也見濟北陳君知和墓誌銘孟祖以蜀
 歸會祖諱省華始來自蜀為祥符人
 仕本朝為左諫議大夫碑載省華聞太夫人憂亟解印州民結狀以
 留上敷詔賜允號讓不獲視事如舊宋重守令曲遂民望
 為之奪情如此又載受詔歸闕人懷舊惠蓋指省華在濟
 源已內召而史惟稱徙樓煩令復召為太子中允攷之未
 審也後又載省華秩為諫大夫而史稱拜左諫議大夫又
 以諸子貴贈官至尚書令史贈太子少師皆宜以碑為據

後列將仕郎縣尉王宏將仕郎守主簿王克昌左班殿直
 知縣事兼兵馬監押裴德滋三人名左班殿直由武階知
 縣事按之職官志惟建炎多差武臣此當天聖間已以武
 階為之矣

勸慎刑文并序正書天聖中
 年在西安府學

序文正議大夫守禮部尚書充集賢院學判西京留司御

史臺柱國南安郡開國公食邑四千三百戶食實六百戶

賜紫金魚袋晁迥述宋史列傳迥請分司西京特拜工部

尚書集賢院學士判西京留司御史臺仁宗即位遷禮部

尚書証之此題但于爵南安郡開國公失載其食邑及實

封之數參差不符史所謂加例而無定法者職此故也傳

稱迴遷殿中丞坐失入囚死罪奪二官是以暮年著此文而約舉正經正史期于深識之士三復盡心則豈非髦而能舉其過者與後又召對延和殿復獻斧展慎刑箴大順審刑無盡燈頌凡五篇當與此文相證明惜佚未盡傳隨手雜錄晁文元迴嘗言歷官臨事未嘗挾情害人危人售進保全固護如免髮膚之傷由此文觀之迥爲人信可風矣

范雍題名

右題名一正書自左起文云陝西轉運使尙書兵部員外郎賜紫金魚袋范雍乾興壬戌歲四月七日又題名一正書自右起文云去年題名在缺今歲自三司度支副使遷

此官復爲本路轉運使再謁靈祠天聖癸亥九月十四日按前題名所記乾興真宗改號是年二月仁宗嗣位猶未改元故稱乾興也宋史本傳雍歷河北陝西轉運使入爲三司戶部副使又徙度支以尙書工部郎中爲龍圖閣待制陝西都轉運使然當乾興已爲尙書兵部員外郎史竟失載又爲陝西都轉運使職官志載諸路事體當各一則置都轉運使以總之又云都運廢置不常而正使不廢雍旣前稱陝西轉運使後又云復爲本路轉運使蓋本路與兼諸路有異而史乃以爲都轉運使記載之舛賴石刻正之類如是也又案志稱三司使內鹽鐵度支戶部各副使以員外郎以上歷三路轉運及六路發運使充雍前題陝

西轉運使尙書兵部員外郎充此官是也雍本傳始入爲
三司戶部副使後遷度支故題名稱度支而東都事畧脫
度支不書失其官敘矣

留題延慶寺詩 正書在濟源

延慶寺留題詩范雍伯純二章陳堯佐希元和詩三章初
書于碑未知何時摹勒上石首題尙書戶部侍郎知河陽
范不書名當是希元命其子書牌故爲缺之伯純記延慶
精舍故潁川密相以昔先中令會製錦是邑與參預貳卿
及天雄故帥俱肄業于寺天禧中密相謝病乞理此邦真
廟美其若畫錦而歸御製贈行詩傳在屋壁按密相堯佐
兄堯叟也宋史列傳堯叟素有足疾屢請告九年夏帝臨

問勞賜加等疾甚表求避位遣閤門使楊崇勳至第撫慰
以詢其意堯叟詞志頗確拜右僕射知河陽肩輿入辭至
便坐許三子扶掖升殿賜詩爲餞今序題所謂御製贈行
詩蓋指其事但堯叟出知河陽由于陳乞欲得便地則傳
未嘗具錄也序稱天禧中密相謝病傳以爲在大中祥符
九年宰輔表亦書九年八月丙戌樞密使陳堯叟辭疾以
尙書右僕射免陳述古題名序其家世云祥符九年孟父
中令公引罷樞府相國出判三城與史同此題作天禧中
未知孰得其審堯佐和詩內註先中令昔典是邑兄長相

公季弟太尉洎子皆肄業茲寺 述古題名亦云太平興國六年先祖太師中令秦國

公宰邑茲土時孟父中令大人太尉按傳載堯佐父省華
相公季父太尉康肅公並肄業精舍

事孟昶為西水尉蜀平授隴城主簿累遷襍陽令徙樓煩
 令以此題放之固已為濟源令矣堯佐兄弟從父宦遊肄
 業於茲其遺跡向有題名壁龕而傳唯載堯佐初肄業編
 歷後從种放於終南山豈非不及詳采之過與又雍出知
 河陽堯佐出知永興軍府俱當明道二年太后崩後執政
 多罷免雍本傳罷為戶部侍郎知陝州改永興軍以疾請
 近郡遂知河陽堯佐傳以戶部侍郎知永興軍與序題合
 堯佐和詩成遣稚子贊善大夫通判邠州事學古寫于此
 牌歐陽集文惠神道碑銘學古虞部員外郎即其人碑後
 題聖宋景祐三年歲丙子三月清明日書又題前永興軍
 節度掌書記陳諭赴闕同太常博士秘閣校理范宗傑撰

御寺閣諭與宗傑或即陳范兩鉅公之族屬與

衛夫人墓誌銘

正書寶元二年八月

誌題高平縣君即左千牛衛將軍衛廷諤繼室其誌刻於
 衛君誌石之陰殘缺三十餘字隴西李之才撰文云夫人
 姓徐錢塘人父裕子五人口口口口殿直口口觀口皆舉
 進士景祐五年春觀御試不利既黜且以兩經禮部進名
 則以州長史處之觀實預之不顧出有相謂者曰子母老
 何愧易褐以怡其心觀明日反有就意夫人聞之亟走報
 以書云汝年且少口為名進士無效庸常用是觀益聞於
 人攷禮部進名宋之恩例所謂特奏名也宋史選舉志景
 祐初詔曰凡年五十進士五舉諸科六舉嘗經殿試進士

三舉諸科五舉預先朝御試雖試文不合格毋輒黜皆以名聞是觀兩經禮部進名得預釋褐其邀恩數當沿于此及後蘇軾孔文仲言舊制禮部已奏名至御試而黜者甚多嘉祐始盡賜出身益與誌文徵信也之才字挺之宋史有傳嘗調孟州司法參軍意觀得友于挺之爲其母作誌有由然矣

陳述古題名

寶元二年九月在濟源

右陳述古題名文自左行云太平興國六年先祖太師中令秦國公宰邑茲上時孟父中令大人太尉相公季父太尉康肅公並肄業精舍祥符九年孟父中令公引罷樞府相國出判三城天聖六年述古倅白波曹口與仲弟殿省

丞求古師之同遊今忝運局使領之任率前淮安從事尹宗濟載之前三堂盧川令韓襲紹先專謁靈祠復此憇止稚子祝史知雄知方知白守芸校知十已下六人時寶元已卯登高前五日尙書金部員外郎陳述古行之題下又有小字題云後治平丙午歲重五日男將仕郎守孟州濟源縣尉知素立石按述古爲堯佐子此題稱大人太尉相國者堯佐也堯佐與兄堯叟弟堯咨並肄業精舍卽謂濟源之延慶寺今見有留題石刻詩范伯純記延慶精舍故穎川密相以昔先中令曾製錦是邑與參預貳卿及天雄故師俱肄業於寺者是也題稱倅白波漕按今孟縣西南四十五里黃河北岸上大小凡三寨其下爲白坡渡當爲

宋之白波字或從土從水地實一也宋史食貨志河東陝西船運至河陽措置陸運意其時白波在河陽之西水勢湍急牽挽艱澁更置遞運故立漕司於此今檢富紹庭傳提舉三門白波輦運李伯宗傳提舉白波輦運薛弼傳改三門白波輦運是其事也求古見李淑傳淑初在鄭州作周陵詩國子博士陳求古以私隙訟其譏訕朝廷又述古忝運局劉几傳轉運使陳述古攝渭帥卽此題運局使領也

李惟賢北嶽題名

右題名正書文云持父中山太守改感德軍留後誥命至恭謁真祠康定元年十一月十一日閤門通事舍人勾當

御厨李惟賢記弟惟賢書宋史地理志定州政和三年升爲府改賜郡名曰中山此題當康定元年未名中山也文人喜以古地名易之耳然後曰改賜之識起于此矣感德軍卽耀州太平興國初改名太守亦倣古職名自署惟賢見李昭亮傳子惟賢字寶臣以父蔭爲三班奉職後爲閤門祇候通事舍人此題閤門通事舍人與史合又昭亮歷知瀛定二州感德軍節度觀察留後故云中山太守也惟寶亦昭亮子而傳未之附從畧也

朝城縣孔子廟記

八分書慶歷四年五月

朝城縣孔子廟記前題建康劉之圖言三艘王樂書太原霍處鈞篆額記後列文林郎守縣尉樂令德文林郎守主

簿張仲華承奉郎守著作佐郎知縣事田諒諸人銜名諒嘗爲令朝城興建孔子廟而當時爲敘其事予約斯文有云大丞相文正王公出鎮於魏魏博之學始有口焉慶歷壬午之紀著作佐郎田君諒爲魏朝城事之初年卽召民興學於是畢力以致謹然告成壬午之紀慶歷二年也又云田君青之有口堵口嘗與天章侍講趙君師民講學於青時稱山東之冠立朝之賢而豪者多出門下初命永靜軍東光主簿不鄙其俗率子弟以教之登仕籍數有焉然則田君固號爲良吏者矣惜史不爲立傳而齊乘亦未著名故莫知其事跡始末諒後歷官又見興州新開白水路記題銜利州路諸州水陸計度轉運使兼本路勸農使

奉郎守尙書工部郎中充集賢校理輕車都尉賜緋衣其時當嘉祐二年距慶歷壬午十有六歲矣諒於白水路亦爲踵修實司其成蓋所在皆有績狀如此趙師民宋史有傳云青州臨淄又遷天章閣侍講與記合

田況題名

右題名正書文云慶歷仲冬

缺二

樞密直學士田況改命

赴涇原與弟

缺字

同謁東都事略況除龍圖閣直學士知

成德軍徙秦州進樞密直學士知渭州宋史地里志渭州

舊置涇原路經略安撫使故況以渭州有涇原之目矣然

自稱改命其由秦州而徙渭與至云慶歷仲冬紀時而不

紀年所未詳也

韓魏公北嶽題名

右題名在魏公所書碑陰首三行大字徑二寸餘文云皇祐元年冬十月九日重修嶽祠畢功既勒文以謹其事乃列將佐官屬名氏于石陰庶永後觀亦魏公自書記後列將佐官屬名氏分三層字寸餘非魏公書矣第一層文林郎守冀州武邑縣令管勾定州路安撫司機宜文字陳薦入內內侍省內侍高品真定府定州等路走馬承受公事謝禹珪西頭供奉官真定府定州等路走馬承受公事陳有方供備庫副使定州路駐泊兵馬都監趙滋供備庫副使定州路駐泊兵馬都監張悛西深院使資州刺史定州路駐泊兵馬鈐轄張忠北作坊使綿州團練使內侍省內侍右班副都知定州路駐泊兵馬都監任守忠侍衛親軍馬軍副都指揮使保太軍節度觀察留後定州路駐泊馬步軍副都部署狄青第二層順安軍判官將仕郎試秘書省校書郎權節度觀察推官公事仇公綽莫州防禦推官將仕郎試秘書省校書郎權觀察推官周革節度推官承奉郎試大理評事劉循將仕郎試秘書省校書郎權節度掌書記馬良器內殿崇班定州兵馬都監兼在城巡檢劉斌內殿崇班定州兵馬都監兼在城巡檢劉宜孫內殿崇班定州駐泊兵馬都監石宗閔朝奉郎太常博士通判定州軍州兼制置營田及管內勸農事騎都尉借緋錢貽範朝奉郎尚書屯田員外郎通判定州軍州制置營田及管

內勸農事騎都尉賜緋魚袋游開第三層將仕郎守曲陽
縣尉盧至堅將仕郎守曲陽縣主簿李柔左班殿直知曲
陽縣事兼兵馬堅押口昭文林郎守司法叅軍房士安將
仕郎守司戶叅軍裴士諤登仕郎守司理叅軍趙諮承奉
郎守錄事叅軍曹盡忠按碑記定州一路官屬之制証以
宋史職官志走馬承受諸路一員此設二員却掃編祖宗
時諸路帥司皆有走馬承受公事二員一使臣一宦者屬
官也今碑謝禹珪爲宦者陳有方爲使臣亦與舊制合則
史攷之不審矣文獻通考走馬承受諸路各一員宋仁宗
時置以三班使臣及內侍充亦未盡然
通判當建隆時大郡置二員餘置一員定州路屬大郡題
名通判有二員與志合在城巡檢二員蓋州縣所置非沿

邊及數州數縣例也史列傳陳薦字彥升從韓琦定州河
東幕府此題管勾定州路安撫司機宜文字於時卽在魏
公幕也守武邑縣令益爲華陽尉獲盜後轉官而史失書
矣張忠史有二人一字聖毗一不書字皆開封人此題卽
傳不書字者傳云遷如京使資州刺史歷真定府定州高
陽關京東西路兵馬鈐轄亦見郭勸傳韓琦言勸所遣將
張忠劉遵平賊功皆第一者是其人也趙滋本傳云自東
頭供奉官超受供備庫副使定州路駐泊都監任守忠見
宦者傳云以功再遷東染院使內侍押班出爲定州鈐轄
加內侍副都知按題名則爲北作坊使出爲轄又爲內侍
右班非押班也狄青傳云徙真定路副都總管歷保大安

遠二軍節度觀察留後又遷馬軍副都指揮使据此題為定州路時已帶馬軍副都指揮保大軍銜傳敘在定州路以後歷官少失其次故備錄之

重修北嶽廟記 正書皇祐二年正月在曲陽

記為魏公撰并書約其文有云每歲立冬天子以所署祝册就遣守臣以祇祀事與禮志立冬祀北嶽恒山合又記稱慶歷八年夏六月琦獲領州事本傳云知定州兼安撫使是也然傳未明其請外之歲月今以碑証之並知其實矣修廟與事者通判軍州事屯田員外郎游開縣主簿李奕碑末結銜署名朝奉郎太常博士通判定州軍州兼制置營田及管内勸農事上騎都尉借緋錢貽範篆額

趙滋北嶽題名

右題名正書文云皇祐三年正月二十七日奉安撫移文詣北嶽靈宇點檢未完之處二月朔日還郡西京左藏庫副使定州路監兵趙滋記滋見韓魏公嶽廟碑陰題蓋當皇祐二年為供備庫副使定州路駐泊兵馬都監至三年又遷西京左藏庫副使矣滋本傳未之書也職官志西京南京北京各置左藏庫題名與志合監兵當為都監易名所云奉安撫移文詣北嶽靈宇點檢未完之處蓋元年重修至此又檢視爾

王鼎北嶽題名

右題名別鐫一小碑式用花文邊欄額題王公題名親筆

下書皇祐庚寅三月十三日庚子奉勅以久旱乘驛請雨于北獄甲辰離京是夜雨二尺壬子宿齋宮以二十八日乙卯祭告甲寅復被詔賽謝越四月五日辛酉行禮宣德郎守尚書屯田員外郎騎都尉賜緋魚袋王鼎謹記按庚寅為皇祐二年以仁宗紀考之是年三月甲午遣官祈雨丙午雨据題名則庚子請雨至甲辰夜已雨矣王鼎史有傳云累遷太常博士提點兩浙刑獄降知深州徙建州提點河北刑獄召為開封府判官改鹽鐵判官累遷司封員外郎淮南兩浙荆湖制置發運副使入為三司鹽鐵副使遷刑部郎中天章閣待制河北都轉運使徙河東卒然于守尚書屯田員外郎不書蓋略之也鼎強果自任號為名吏今得其手筆自題益足珍惜也

李杞題名

右題名正書文云華州渭南縣主簿權華陰縣事李杞伏謁靈祠皇祐辛卯仲冬初二日題辛卯皇祐三年也宋史食貨志王韶建開湟之策委以經畧熙寧七年始遣三司幹當公事李杞入蜀經畫買茶於秦鳳熙河博馬八年杞以疾去今題名者即其人又文同丹淵集呈李堅甫中舍杞詩云因君奉使臨敝邑與可蜀之梓州人此正其入蜀時也益可舉証

劉兼濟北嶽題名

右題名正書文云皇祐辛卯仲冬後十日因往邊部巡歷

專詣聖祠朝拜河北沿邊安撫副使西上閣門使惠州刺史劉兼濟題男殿直振孫試校書郎詵孫侍行宋史列傳兼濟劉平弟云累遷文思副使惠州刺史河北緣邊安撫副使擢西上閣門使與題名合其男振孫詵孫史未之紀也

蘇舜元題名

右題名正書字大三寸文云蘇舜元才翁題又字兩行文不全唯皇祐癸巳孟春缺因之河南府也癸巳為仁宗改元皇祐之五年舜元附宋史蘇舜欽傳後云兄舜元字才翁為人精悍任氣節為歌詩亦豪健尤善草書舜欽不能及官至尚書度支員外郎三司度支判官東都事畧郭承祐傳稱轉運使

蘇舜元今此題所書勁折不佻以証史言善草書洵為非訛

陸務觀過羅源縣走馬嶺見崖石刻才翁書樹石二大字告縣令作欄楯護之其書為當時所貴如此况傳之積歲

益久如予所收者是尤可寶愛也

京兆府小學規裴珍正書至和元年四月在西安府學


碑稱准使帖指揮于宣聖廟內置立小學於生徒內選差學長二人至四人傳授諸生藝業及點檢過犯其諸生學課分為三等又懲其過犯並量事大小行罰攷之宋史職官志國子監小學置職事教諭二人掌訓導及考校責罰學長二人掌序齒位糾不如儀者今碑內所舉規式并依國子監制度蓋由慶歷四年詔諸路州軍監各令立學于

是當路體其意復以小學建置故碑稱准使帖也是時任使職者爲文潞公然則京州府小學潞公實爲之倡而史不及載也碑後列權府學教授滿宗孟本傳畧其任此職又列府學說書兼教授裴瀆職官志淳化五年判監李至奏爲直講以京朝官充其後又有講書說書之名並以幕職州縣官充此刻稱說書則府學亦置員矣史文所未詳碑足以拾其遺也又列大理寺丞簽署觀察判官廳公事專管勾府學李縉篆額秘書丞通判軍府兼管內勸農事提舉府學韓繹繹忠獻子見韓億傳後又列尙書比部員外郎通判軍府兼管內勸農事提舉府學薛侏江隣幾雜志所稱薛侏比部者卽其人又大書列忠武軍節度使特

進檢校大尉知軍府事文氏而不名知爲潞公也本傳改忠武軍節度使知永興軍至于階特進及加檢校史畧而不書又列本學教授兼說書草澤任民師志載慶歷四年始置教授委運司及長吏于幕職州縣內薦或本處舉人有德執者充民師稱草澤當以舉人膺薦而自爲別異使世知非由幕職州縣者爾

受業金石文字續跋卷九

五



受業金石文字續跋卷九終

受業汝陽李應

